

四庫全書

史部

欽定四庫全書

史部

資治通鑑前編卷一

詳校官編修臣潘廷筠

編修臣裴謙履勛

總校官降調編修臣倉聖脉

校對官編修臣吳錫麒

謄錄監生臣教秉常

欽定四庫全書

史部二

資治通鑑前編

編年類

提要

臣等謹案資治通鑑前編十八卷舉要三卷

宋金履祥撰履祥有尚書表注已著錄案柳貫作履祥行狀曰司馬文正作資治通鑑繫年著代秘書丞劉起作外紀以記前事顧其志不本於經而信百家之說不足傳信乃用

邵氏皇極經世書胡氏皇王大紀之例損益
折衷一以尚書為主下及詩禮春秋旁採舊
史諸子表年繫事後加訓釋斷自唐堯以下
接於隋治通鑑勒為一書既成以授門人許
謙曰二帝三王之盛其微言懿行後王所當
法戰國申韓之術其苛法亂政亦後王所當
戒自周威烈王二十三年以後司馬公既已
論次而春秋以前無編年之書是編固不可

莫之著也云云蓋履祥撰述之意在於引經
據典以矯劉恕外紀之好奇惟履祥師事王
柏柏勇於改經履祥亦好持新說如釋桑土
既蠶引後所謂桑間為証釋封十有二山濟
川謂營州當云其山碣石其川遼水以篤公
劉七月二篇為幽公當時之詩非周公所追
述又以七月為幽詩篤公劉即為幽雅詩不
免於臆斷以春秋書尹氏卒為即與隱公同

歸於魯之鄭大夫尹氏尤為附會至於引尚
書記異於周昭王二十二年書釋氏生則其
徵引羣籍去取失當亦未必遽在恕書上也
然援據頗博其審定羣說亦多與經訓相發
明在講學諸家中猶可謂究心史籍不為游
談者矣履祥自撰後序謂既編年表例須表
題故別為舉要三卷凡所引經傳子史之文
皆作大書惟訓釋及案語則以小字夾注附

綴於後蓋依朱子綱目之體而稍變通鑑之
式後來浙江重刻之本則舉要為綱以經傳
子史之文為目而訓釋仍錯出其間已非其
舊又通鑑綱目刊本或以此書為冠題曰通
鑑綱目前編亦後來所改名今仍從原本與
綱目別著於錄以存真焉乾隆四十六年十
二月恭校上

總纂官臣紀昀臣陸錫熊臣孫士毅

總校官 臣陸費墀

通鑑前編前序

朱子曰古史之體可見者書春秋而已春秋編年通紀以見事之先後書則每事別紀以具事之始末意者當時史官既以編年紀事至於大事則又採合而別記之若二典所記上下百有餘年而武城金縢諸篇或更數月或歷數年其間豈無異事蓋必已具于編年之史而今不復見矣履祥按竹書紀年載三代以來事迹然詭誕不經今亦不可盡見史記年表起周共和庚申之歲

以上則無紀焉。歷世浸遠，其事往往雜見于他書。靡適折衷。邵子皇極經世，獨紀堯以來起甲辰為編年。歷胡氏皇王大紀亦紀甲辰以下之年。廣漢張氏因經世之年，頗附之以事。顧胡過于詳而張失之簡。今本之以史子傳紀附之以經，翼之以諸家之論，且考其繫年之故，解其辭事，辨其疑誤，如東萊呂氏大事記而不敢盡倣其例。起帝堯元載止周威烈王二十三年，接於資治通鑑名曰通鑑前編。昔司馬公編輯通鑑，先為長編，蓋長

編不嫌于詳而通鑑則取其要也後之君子或有取于斯馬要刪之以為通鑑前紀是亦區區之所望也昔景定甲子正月丁丑朔仁山金履祥吉甫序

通鑑前編者仁山先生之所著也先生姓金氏諱履祥字吉甫婺州蘭溪人自言世本項氏其先項伯入漢以恩賜姓曰劉暨五季吳越有國避武肅王嫌名從文更為金氏先生幼知嚮方長而好學天文地形禮樂刑法田乘兵謀陰陽律厯之書靡不畢究及壯事文憲王先

生柏從登文定何先生基之門講貫愈精造詣益邃何先生蓋受業於黃文肅公榘文肅公則朱子之高第弟子也先生嘗一舉進士不利遂絕意進取以布衣游諸公間率以文義相處當宋季年睹國勢阽危慨然欲以奇策匡濟為在位所沮議格弗上其語祕不傳然當時計畫之士咸歎其策不用德祐初以迪功郎召解中褐入史館編校蓋將漸進用之而國已不可為矣中年以來遺落世務築居仁山之下頗以講學著書為事訓誘

學者諄諄不倦言論風指皆可誦法先生神勁而清氣
候明潔平居獨處終日儼然至與物接則盍然和懌閨
門之內相敬如賓生平篤於分義有故人子坐事母子
俱繫妾官其後分配為隸子母不相知生死者垂十年
先生傾貲營贖卒贖以完其子後貴先生終不自言相
見勞問辛苦而已聞者莫不歎息方從王先生時與同
舍生夜步庭中指謂之曰某星入某次其分野當有某
變已而果然鄆人李某者嘗侍坐於先生言次及其鄉

里先生因歷歷為言其山川風土物產之宜如指諸掌
其大驚服先生之於學其精博類如此所著有尚書表
註論語孟子集註攷證大學章句疏義行於世文集如
千卷藏於家先生嘗謂司馬文正公作資治通鑑秘書
丞劉恕作外紀以記前事顧其志不本於經而信百家
之說是非既謬於聖人此不足以傳信自帝堯以前不
經夫子所定固野而難質夫子因魯史以作春秋始於
魯隱之元實周平王之四十九年也然王朝列國之事

非有玉帛之使則魯史不得而書非聖人筆削之所加
况左氏所記或闕或誣凡若此類皆不得以辟經為辭
迺用邠氏皇極經世歷胡氏皇王大紀之例損益折衷
一以尚書為主下及詩禮春秋旁採舊史諸子表年繫
事復加訓釋斷自唐堯以下接于通鑑之前勒為一書
名曰通鑑前編凡有十八卷舉要三卷既成以授門人
許謙曰二帝三王之盛其微言懿行宜後王所當法戰
國申商之術其苛法亂政亦後王所當戒自周威烈王

二十三年以後司馬公既已論次而春秋以前迄無編年之書故是編不可以不著也先生之歿今二十有五
年矣是書雖存世亦莫能知者謙永懷夙昔之語言獨
抱遺編而太息門人御史臺都事汝南郭炯為南臺御
史日嘗欲刊行是書有志而未果今肅政廉訪使平陽
鄭公允中爰始解驂聿崇正學尚論格人章明善道載
閱是編三復嘉歎謂宜立於學官傳之後世迺詢之監
憲左吉公亦克欣贊暨僚列賓佐罔不協從亟命有司

鈔諸文梓共捐秩祿以佐其費厥功告備將表上送官
而命謙為之序謙深惟先生以高明之學負經濟之才
生於季末道不克用暨運啓休明則年既老矣其所著
述間已獲行於世惟是編之作廣博精密凡帝王經世
之大猷聖賢傳道之微旨具在是矣或者得以充延閣
之儲備乙夜之覽庶幾發揮聖學啓沃淵衷裨我國家
稽古之治為生民無窮之澤則先生為不朽矣謙不佞
不足以明先生之心發盛德之蘊敢纂錄先生行事之

大畧以標諸卷首若夫著作之意則已備於先生所自
序茲不詳述皇元天曆元年十有二月庚子門人金華
許謙謹序

進道鑑前編表

竊臣采錄金華儒士金履祥祥撰次通鑑前編上下卷
舉要三卷官為鈔梓裝褱成上下冊隨表上進者伏以
帝王之制坦然明白幸往聖方冊之具存日月所照莫
不尊親矧昭代車書之盛際欲仰贊緝熙之學願下采

謏聞之言如螢爝謾附於大明而蹄涔何增於鉅海深
懷懇悃祇重震兢臣誠惶誠恐稽首頓首竊惟左史書
事右史書言自昔紀載之難備前王為律後王為令歷
代因革之異宜學者將博古以明經史官必表年以始
事惟敬王威烈之會竇春秋戰國之交爰有外紀大事
記之書以正史記紀傳等之闕若筆削盡宗乎孔聖則
修纂必始乎陶唐蓋正次王王次春首植綱常之大本
而事繫時時繫年以示述作之弘規本春秋以折衷推

甲辰而正始恥裨官之駸雜黜汲冢之誕誣有臣履祥當宋景定研精於甕牖繩樞之隙待用於金匱石室之藏考撫近千餘年彙次為上下卷庶幾三代以降之理亂若網在綱一元以後之乘除如指諸掌為萬世之龜鑑表百篇之範模旁及諸書庸侑博識倘遂芻蕘之采不孤芹曝之忠茲蓋伏遇皇帝陛下厯數在躬文思稽古宏闡圖書之府廣延惟幄之儒每機務得遂於燕閒而聖睿猶資於啓沃學於古訓雖寸陰克慎於淵衷欽乃攸

司俾百辟咸遵乎成憲是以發號施令克廣好生之仁
立政任人深得詒謀之道至如庸劣亦被簡知本乏六
轡周原之才欲訪束帛丘園之士冀仰裨於政理以效
報於涓埃蓋問俗莫重於舉賢而著書莫先乎立教俯
賜容光之照少酬繼晷之勞使寒士咸鼓舞於菁莪知
下才不棄捐於棫樸家求遺藁可曾無司馬封禪之書
人誦法言誰知有子雲太玄之易謹表上進以聞臣下
情無任不勝瞻天樂聖激切屏營之至謹言

欽定四庫全書

序

欽定四庫全書

資治通鑑前編卷一

宋 金履祥 編

陶唐氏帝堯

羅氏路史曰堯生於母家伊侯之國後從者故曰伊耆氏年十有三

佐李封植受封于陶通鑑外紀曰年十五長十又受封唐年十六即天子位者左氏傳作初漢

史曰伊氏

書曰粵若稽古帝堯曰放勳

粵起語若稽追記之辭古崇之也堯名古者世質雖

天子不諱其名放勳者總名其德業之大也一日放如推而放諸之放謂推廣以成其功也聖人亦善

推其所為而已意與下文二章相應二字
本史官稱堯之語後世因以為堯稱焉

欽明文思安

安允恭克讓光被四表格于上下

此叙堯之德也欽誠敬也明精明也文

理也經緯天地曰文謂其彌綸天地之道倫理明順煥
乎其有文章也思言其運量裁處意思周密所謂其智
如神也安安舊說止其所止然二字氣象自別蓋其盛
德從容之極難以形容故以安安言之恭讓欽之接於
人也謂之允克則其至誠之發真實氣象又自不同光
被四表言其發越履胃之盛格于上下言其充塞咸通
之極也史臣叙堯之德而以欽為首此聖人之心法也
允恭以下即四德之推恭讓者欽之發被四表者明文
之著格于上下則思之咸通也朱子常言聖人之心精
明純粹而已則欽明二字已足以盡聖人之德矣而又
曰文思陳文蔚曰兼語其用也文者明之用思者欽之
用欽明則惟精惟一文思即允執厥中也子王子曰欽

明文思猶言
仁義禮智

克明俊德以親九族九族既睦平章百姓

百姓昭明協和萬邦黎民於變時雍

明推明也俊德大學作峻蓋其得乎

天而出乎其類者即上文所叙之德也平者和同之章者品節之百姓者帝畿之民昭明則民心風俗之俱新也萬邦諸侯也協考比也如協時月如圖語司民協孤終司徒協旅之協皆考比之義和調齊也萬邦諸侯豈無賢庸之不齊聖人朝覲巡省考禮正刑一德黜幽陟明皆所以協和之也黎民黑首之民舉天下生靈之衆也上文紀聖德之盛此章紀治化之序聖人治天下其機有二一則盛德發越自然感化一則布政施化推而廣之也

甲辰元載乃命羲和

邵子皇極經世虛係之元年又東漢志晉志皆引春

秋文雖鈞曰唐堯即位羲和立象儀則是命羲和帝堯即位之初政也又按國語楚觀射父曰少昊之衰也九黎亂德顓頊受之乃命南正重司天以屬神命北正黎司地以屬民堯復育重黎之後不忘舊者使復興之以至夏商故重黎氏世叙天地而別其分主揚子曰羲近重和近黎韋昭曰即羲氏和氏也

乃命羲和欽若昊天歷象日月星辰敬授人時

羲和二氏也

紀數之書也言天者所謂堯歷也象者觀天之器後篇所謂璣衡之屬是也言天者謂渾儀實始于此上古以來因時作事而歷法益未備帝堯始為歷象之制定其裁成輔相之節以授其民遂為後世常行之準焉朱子曰此所命蓋羲伯和伯下文分命其仲叔履祥按尚書大傳舜巡四嶽祀泰山霍山皆奏羲伯之樂華山弘

山奏和伯之樂其方與時與二氏所掌者合則義伯和伯當有其人蓋四子分職必有二伯總之不然歷法無所統矣

分命義仲宅喁夷曰暘谷寅賓出日平秩東作日

中星鳥以殷仲春厥民析鳥獸孳尾申命義叔宅南交

劉氏云宅南曰交陳

氏云宅南交曰明都

平秩南訛

史記索隱作爲

敬致日永星火

以正仲夏厥民因鳥獸希革分命和仲宅西曰昧谷寅

餞納日平秩西成宵中星虛以殷仲秋厥民夷鳥獸毛

毳申命和叔宅朔方曰幽都平在朔易日短星昴以正

仲冬厥民隩鳥獸氄毛

宅度也蔡雖石經作度朱子云宅度古文通歷法以日行起度

以日出入方隅定晷刻氣候宅嵎夷南交西朔方出納
敬致皆所以定卯酉子午之中推日道出入之方候朝
夕之景及致日中之景寅敬賓饒謹其事也永短中星
皆自是推然候中星又所以定日度也宅嵎夷曰陽谷
周禮所謂日東則景夕多風之地也南文曰南則景短
多暑之地也昧谷日西則景朝多陰之地也幽都日北
則景長多寒之地也四方地勢不同風氣亦異各有宜
也故測候之際因度其所宜為授時之節所謂平秩東
作南訛西成朔易者也易如周官所謂一易再易三易
作說成易皆謂民事各以方異辭耳平秩史記依今文
作便程其義尤明日宵永短與中星連言者初昏而候
中星以星之初見為晝夜之分又分摺四中以得日度
之酌以日宵之中立二分以永短之極立二至三之民
生析因夷隩而為四時之政鳥獸孳尾等語則候之物
生此歷家七十二候之法所由起也此皆授羲和以作
歷之綱要四子分為四節每節自作訛成易以上分方

自日宵永短
以下分時

二載定閏法

帝曰咨汝羲暨和朞三百有六旬有六日

有古文作又

以閏

月定四時成歲允釐百工庶績咸熙

帝既命羲和歷象又四時推侯皆合

矣積一朞而天有餘度歲有餘日於是又置閏法而日月氣候始參會今歷家所定章法昉乎此隆古風氣未開民淳事簡歷數既定因時頒政而已他無為也故允釐百工而庶績咸熙焉朱子書傳曰歲周三百六十五日四分日之一而曰三百六旬有六日者舉成數也天體至圓周圍三百六十五度四分之度之一繞地左旋常一日一周而過一度日麗天而少遲一日繞地一周無餘而常不及天一度積三百六十五日九百四十分日

之一百三十五而與初經會是一歲日行之數也月麗
天而尤遲一日常不及天十三度十九分度之七積二
十九日九百四十分日之四百九十九而與日會十二
會得全日三百四十八餘分之積五千九百八十八如
日法九百四十而一月得六日不盡三百四十八通計
得日三百五十四九百四十分日之三百四十八是一
歲月行之數也歲有十二月月有三十日三百六十者
歲之常數也故日行而多五日九百四十分日之二百
三十五者為氣盈月行而少五日九百四十分日之五
百九十二者為朔虛合氣盈朔虛而閏生焉故一歲閏
餘率則十日九百四十分日之八百二十七三歲一閏
則三十二日九百四十分日之六百單一五歲再閏則
五十四日九百四十分日之三百七十五至十有九歲
七閏則氣朔分齊是為一章也履祥按章法雖云氣
朔齊然猶有分抄之餘至二十七章為會三會為統三
統為元積四千六百一十七年則日月皆無餘分却得

十一月甲子朔子時半冬至則又為歷元矣 今立成
法率三十二月而置一閏 朱子曰按帝堯時冬至日
在虛昏中昴今冬至日在斗昏中壁中星不同者蓋天
有三百六十五度四分度之一歲有三百六十五日四
分日之一天度四分之一而有餘歲日四分之一而不
足故天度常平運而舒日道常內轉而縮天漸差而西
歲漸差而東此歲差之由古歷簡易未立差法但隨時
占候以與天合至東晉虞喜始以天為天歲為歲乃立
差法以追其變約以五十年退一度何承天以為太過
乃倍其年而反不及至隋劉焯取二家中數七十五年
為近之然亦
未為精密也

履祥按帝堯之言天常寬而歷則密後世言天者常
密而歷則疎蓋帝堯生知即事洞要其於周天固已
知圓竒之妙四分一不足以盡天矣其命羲和不過
授之以作歷之綱要如於中星互舉辰象於期數繫

舉全日至於推步度數隨時占候則羲和有司之事
帝堯固不必數數然也後世日不足而始為度度不
足而更為分秒分秒愈多則算法當愈密矣然久亦
未嘗不差也蓋聖人因時制歷雖舉要而不遺後世
定歷推天始積分以求密因時制歷則歷與天常相
應定歷推天而歷與天常易差無他天圓以動圓故
奇動故不測而後世執定法以拘之也然嘗就其說
而考之所謂四分度之一也析為九百四十分日之
二百三十五果若所言則止曰四分之一可也何必
析為小分哉太初草創乃以八十一分日之二十分
少固不足論晉志載劉洪王蕃之法則析為五百八
十九分度之百四十五如此則四分度之一者乃其
大約而於四分之一之外天舒日縮又餘小分之九也
十年則九十分計百三十年而積差二日矣唐開元
大衍歷又析一度為三千四十分每歲日餘三十七
分太積八十年而差一度又餘六分自唐至今皆用

之然自開元至寶祐五百四十年而差十度則唐歷積分雖多反不如晉志之近密也紹興統元歷漢上朱震典之析一度為萬分每歲氣周三百六十五日二千四百四十六分七十二秒半而周天則三百六十五度二千五百七十二分二十五秒又按堯仲春星鳥宋東井二十一度中仲夏星火宋亢七度中仲秋星虛宋斗十一度中仲冬星昴宋壁一度中堯歷中星與日所次至是差四十餘度矣去堯之世三千五百餘歲而差四十餘度至景定甲子冬至之日已在斗初漸入東陸後此三千六百年已在東陸又三千六百年過東陸之中又三千六百年冬至之日遂行南陸則冬長夏短幾相貿易造化不幾於變乎曰非然也唐張說一行歷議曰日之所行即為黃道日差則黃道與之俱差必不至於冬長夏短矣抑後世豈無聖人隨世裁成良太史隨時推移者此固不必長慮也

七載麒麟遊於藪澤

路史曰堯在位七年民不作武鵠又逃於絕域麒麟遊於藪澤則能

信於人也 十有二載巡狩

發例於此後不悉書孔子曰舜臨民以五堯臨民以十二註十二載

一巡狩也路史註曰杜佑謂十二載巡狩者非

甲子二十有一載甲申四十有

一載虞舜生於諸馮

孟子曰舜生於諸馮蘇氏古史曰舜生於諸馮之姚墟故為有姚居

於馮洳故為有馮

履祥按舜生姚墟因生為姓故為

姚姓居馮洳後世復因居馮而為馮姓非舜有二姓也

諸馮馮洳皆在今河東府河東縣馮水源出首山入西

河孟子以舜生諸馮為東夷之人蓋對文王西夷而言

猶云東方西方爾故曰地之相去千有餘里蓋自河中

至岐周千餘里也而說者指齊之歷山濮之雷夏為舜

側微耕漁之地甚者指會稽上虞牛羊村百官渡為舜

所居蓋因孟子之言而附會之也 路史曰其北國于

虞始為虞氏河東虞阪系出虞幕 春秋外傳周太史伯曰虞幕能聽協風以成樂物生傳曰自幕至于瞽瞍無違命謂能服事帝朝舜重之以明德 史記曰父瞽瞍盲索隱曰母握登史記據世本敘窮蟬橋牛者非

五十載帝遊於康衢

列子曰堯治天下五十年遊於康衢兒童謠曰立我蒸民莫匪爾極

不識不知順帝之則列子書出三代之末尚多傳聞之辭而此語亦自得聖人之意學者稱之今不敢棄 文

中子曰堯有衢室之問 時有老人擊壤而歌曰吾日出而作日入而息鑿井而飲耕田而食帝何力於我哉

叶入聲胡氏附此歌於六十載舜以孝聞 史記曰舜母九十載間今以類附此 六十載舜以孝聞 死替瞍更娶

妻而生象象傲替瞍愛後妻子常欲殺舜舜避逃及有小過則受罪順適不失子道孝而慈於弟日以篤謹年二十以孝聞耕歷山歷山之人皆讓畔歷山今河中府漁雷澤雷澤之人皆讓居今河中府有雷水出雷首山

入河鄭康成謂兗州雷夏澤陶河濱河濱之器皆不苦
窳水經曰河水南逕陶城縣道元註即舜陶處在蒲阪
北南去歷山不遠不苦窳言民皆務為厚正之器不薄
惡喝科也作什器於壽丘就時於負夏負夏衛地一年
而所居成聚二年成邑三年成都胡氏皇王大紀作一
遷二遷三遷莊子又有至鄧之虛而十有萬家大紀
曰得年二十孝友聞於人有友七人焉雄陶方回續牙
伯陽東不訾秦不虛靈甫常輔翼之淮南子曰當此
之時口不說言手不指麾執玄德於心而化馳若神使
舜無其志雖口辨而戶說之不能化一人萬章曰父
母使舜完廩捐階瞽瞍焚廩謂舜已下階而瞽瞍焚之
也使浚井出從而揜之謂舜已出去而瞽瞍塞之也澠水
燕談曰今河中府舜泉坊二井相通所謂為匿空旁出
者也其廟名之曰孝感泉象曰謨蓋都君咸我績象往
入舜宮舜在牀琴象曰鬱陶思君爾忸怩舜曰惟茲臣
庶汝其于予治不識舜不知象之將殺已與孟子曰莫

而不知也象憂亦憂象喜亦喜程子曰人情天理於是為至古史曰孟子曰堯將舉舜妻以二女瞽瞍不順不告而娶既而猶欲殺舜而分其室舜終不以為怨余考之書孟子蓋失之矣四獄之薦舜曰烝烝又格格姦益之稱舜曰夔夔齋慄瞽瞍亦允若則舜之為庶人既已能順其親使不至于姦矣父子相賊姦之大者也豈有既已用之而猶欲殺之哉

履祥按瞽瞍之欲殺舜也象之欲殺兄也史記曰舜母死瞽瞍更娶妻而生象象傲瞍愛後妻子常欲殺舜也然瞽瞍特出於愛憎而舜又非有大過惡何至欲殺之哉嘗考其情則虞氏自幕故有國至瞽瞍亦無違命則粗能守其國者也其欲殺舜蓋欲廢嫡立幼而象之欲殺其兄亦欲奪嫡故爾不然豈以匹夫之微愛憎之故而遽欲殺之哉然則舜固有國之嫡而其為耕稼陶漁之事何也曰古之國家子弟固非

如後世之養養舜之為田漁而人從之又非必如今之漁人陶工也或者見逐於父母故勞役之或避世疇不敢居而自歸於田漁亦因是以行其政教而濟時之窮故雜書有謂舜見器之吾惡而陶河濱見時之貴糴而販負夏孔子曰耕漁陶販非舜事也而往為之以救敗耳此說雖出雜書而實得聖人之意又瞽瞍之欲殺舜在其初年之間而堯之舉舜則在其克諧之後史記反覆重出而莫之辨固也然孟子當時亦不辨萬章之失何也蓋孟子不在於辨世俗傳訛之迹而在於發明聖人處變之心務使學者得聖人之心以推天理人倫之至則其事迹之前後有無皆不必辨矣

六十有一載洪水咨四岳舉鯀俾乂

帝曰咨四岳湯湯洪水方割蕩蕩懷山襄陵浩浩滔天

下民其咨有能俾乂

四岳者掌四方方嶽之官古者大事則咨四岳使詢訪四方之言也

方割始為害也懷山襄陵叙其實也浩浩滔滔天言其勢也滔天當時方言云爾滿望皆水而天影其中若滔天

然 兪曰於鯀哉帝曰吁咈哉方命圮族岳曰異哉試可

乃已

兪曰者四岳以衆言告也鯀者崇伯也方命舊說逆命史作負命按堯典上文方鳩方割皆作方始

之義則此當云我始命為他職時即敗羣自用則治水大任弗可為也圮族猶詩言敗類岳曰者上舉衆言此因獨對異義未詳列子註及柳文與異字同言但用其才可以治水則已不必病其圮族也

帝曰往

欽哉

帝順衆言而使之往復云欽哉以救其失蓋能敬謹則不必圮族自持而事功成矣

六十有

九載鯀績用弗成

九載績用弗成程子曰治水天下之大任也非其至公之心能舍已從

人盡天下之議則不能成其功豈方命圮族者所能哉
雖九年而功弗成然其所治固非他人所及也惟其
功有緒故其自任益強嘒戾圮族益甚公議隔
而人心離矣是其惡愈顯而功卒不可成也

履祥按周漢以來諸事多稱堯有九年之水今考其
時自洪水方割即舉鯀俾久九載無成而後舉舜又
二三年始舉禹禹八年於外而始告成功前後計二
十餘年矣而曰九年者蓋指鯀九載之間也計自方
割以來洪水之害無歲無之如後世歲有河決之患
鯀於其間多為隄防以障之而患日滋甚孟子叙泛
濫之禍在舉舜敷治之上則九年之云蓋謂此時也
然洪水之害一日不可緩而待鯀九載無功始易之
何也傳稱禹能修鯀之功則九載之間非盡無功但
無成耳而三考黜陟之典不可廢是以有羽山之貶
焉或曰僉之舉鯀也方命圮族帝已知之矣知而使
之何與蓋為天下擇人天下之公也當是時舜禹未

與在廷諸人固皆舊德乃若其才則無出鯀之右者
人皆知鯀之才足以集事惟聖人知其剛倖違衆易
於敗事耳帝將戒其所短以用其所長則曰欽哉以
勉之夫欽者心法之要萬事之所由成也以鯀之才
加之敬謹何患無成惟其棄帝之命忽不務此是以
輕視愎言訖瀆于成然則帝固將全鯀之才而鯀則
棄帝之命矣天下之以才自負而忽不加謹祇以取
敗者皆是也寧獨鯀哉又按經稱鯀堙洪水傳稱鯀
障洪水國語又稱其墜高堙卑經稱禹決九川孟子
稱禹疏九河滄濟漯決汝漢掘地而放之海然則鯀
之治水也障之禹之治水導之也其成敗之由以此
當其在鯀也禹何以不諫曰禹安得不諫以鯀之方
命圮族況其子之言乎故禹必有諫鯀必有所不從
舜之知禹亦必以此舜之罪也殛鯀其舉也興禹大
公之道聖人無容心焉抑鯀既以方命圮族失之禹
念父功之未就於是暨益暨稷思日孜孜以成之非

惟克勤于邦以為忠而補前人之愆以濟天下乃所以為大孝也然以禹之聖猶八年於外何也禹八年之間非但導水濬川而已中間畫井田為溝洫定經制酌土宜立賦法通朝貢廣教化於八年之間定千萬世之計此禹之功所以為不可及也

七十載舉舜登庸

帝曰疇咨若時登庸放齊曰胤子朱啟明帝曰吁嚚訟

可乎

登庸之命不言所職帝之意固有在矣朱丹朱也放齊以嗣子朱為對啟明者謂其才智之闇明也

朱之為不肖也亦以此朱子曰此下為樂舜張本

帝曰疇咨若予采驩堯曰都

共工方鳩僝功帝曰吁靜言庸違象恭

今本滔天二字下文之行孔頴

達曰經三言衆人未必一時之事
但歷言朝臣不賢為求舜張本也
帝曰咨四岳朕在位

七十載汝能庸命巽朕位岳曰否德泰帝位

巽入也使入居帝位

也或曰吳曰明明揚側陋師錫帝曰有鰥在下曰虞舜
與遜同

師錫四岳以衆議對也錫予也以衆言對而曰錫重之
也薦聖人於帝此天子也安得不重為之辭老而無妻
曰鰥舜三十未娶而即曰鰥古者聖人繁有人民三十
而娶者期之極也至此而未娶即鰥也書大傳曰父頑
母嚚而不見室家
之瑞故謂之鰥
帝曰俞子聞如何
子聞者已知其人
也如何者更詳其
實也以舜之玄德年三十而聞於天下以堯之明思天
下固無遺照也然聞之而不自舉之蓋為天下擇人必
盡天下之議聖人見大心平大
公無我意象於此可想見也
岳曰瞽子父頑母嚚象

傲克諧以孝烝烝乂不格女

舜處頑罵之下非可以諫諍回父母之心非可以言

語喻父母於道加之傲狠之弟又豈聲音笑貌可以得其歡心哉克諧以孝烝烝乂是益真誠之克積和氣之薰烝也不格烝則象亦不至于為惡矣家難而天下易觀諸克諧烝烝之氣象則舜治天下神化之功用於此可見

帝曰我其試哉女于時觀厥刑于二女釐降二女

于媯汭嬪于虞帝曰欽哉

孟子曰堯之於舜也使其子九男事之二女女焉百官牛

羊倉廉備以養舜于畎畝之中後舉而加諸上位故曰王公之尊賢也舜尚見帝帝館甥于貳室亦饗舜送為賓主是天子而友匹夫也按荀子莊子皆有堯舜問答之辭胡氏大紀亦取之然疑信相半今不取

履祥按史稱黃帝之曾孫譽嘗之子堯則堯黃帝之玄孫也又稱黃帝生昌意昌意生顓頊歷窮蟬敬康

句望橋牛以至赫睽而生舜則舜黃帝八世孫也堯舜俱出于黃帝則二女之妻不亦七宗嬪姓亂序無別已乎或曰晉昏臣曰黃帝之子二十五人得姓者十四人為十二姓其同姓者二人而已異姓則異德異德則異類異類雖近男女相及以生民也又記曰繫之以姓而弗別雖百世而婚姻不通者周道然也然則古已別姓則婚姻不可以通乎曰非也黃帝氏十四人之得姓猶高陽高辛氏之十六族爾昏臣之言為納懷羸故附會而言非正也禮記之言用周道以正諸侯之失也皆非此之謂也世系之傳史記之夫考也昔者歐陽氏固論之矣見六一文集且司馬談遷漢史也其紀漢之初已不知高祖之世系於父曰太公而猶不知其名母曰劉媪而猶不知其氏而其上紀五帝之世母妻嫡庶子孫名氏一無所遺耳目所及尚如此則二千餘年所傳聞者其詳尚足信乎或曰世本也非談遷之所自言也抑世本又豈果

出於三代之時乎以世本為三代之書猶以爾雅為
周公之書也縱使果出於三代之季則周衰傳說已
不可信故朱子謂世本或出於附會假託不可憑據
今以其叙舜之世推之其不可憑也審矣曰然則舜
果何出乎考之於書曰虞舜曰嬪于虞是虞者有國
之稱也參之國語史伯之言曰成天地之大功者其
子孫未嘗不章虞夏商周是也虞幕能聽協風以成
樂物生者也夏禹能平水土以處庶類者也商契能
和合五教以保于百姓者也周棄能播植穀蔬以衣
食人民者也其後皆為王公侯伯夫以虞幕並契稷
而言則幕為有功始封之君虞為有國之號而舜所
自出以王天下者也考之左氏史趙之言曰自幕至
于瞽瞍無違命舜重之以明德夫自幕以至于瞽瞍
則非自黃帝昌意顓頊窮蟬敬康句望橋牛以至瞽
瞍也或曰然則昌意窮蟬以下之說固妄矣國語不
曰幕能帥顓頊乎左氏不曰陳顓頊之族乎曰幕之

出於顓頊左氏國語之說固足徵也然謂顓頊之必
出於黃帝史記之說其果足徵乎黃帝氏歿則少昊
氏作是為五帝之首國語稱少昊氏之衰九黎亂德
顓頊受之則少昊似一代之通稱後世始衰非少昊
帝之世即衰也而史記於黃帝之後不及少昊懸紀
顓頊指為黃帝之孫隔遠無序少昊之代何所往而
黃帝之孫何其壽也莫難明者譜牒莫易知者朝代
史記序朝代尚有遺則其序譜牒豈足信乎夫顓頊
未必黃帝之孫則五帝豈必皆黃帝之後伏羲神農
黃帝是為三皇皆有功德于天下果如史記五帝三
王皆黃帝之後則伏羲神農子孫何以皆無帝王者
商周猶曰世遠也若顓頊高辛陶唐皆黃帝後則一
家伯仲子孫遞相傳授又何必殊薇瓠易五運後世
又何必曰五帝官天下云哉況少昊氏上與伏羲聯
曰太皞少皞不必廢少昊為黃帝之青陽顓頊氏下
與帝嚳氏對曰高陽高辛不必附帝嚳為顓頊之族

子也古之王者必有庶子之官蓋公卿大夫之子凡天下之俊秀與天子之子遊焉學焉者則十四人為十二姓焉又何必皆為黃帝之子也若曰皆黃帝之子則有姓無姓何其偏同姓異姓何其雜也上古之時有同產而為夫婦者帝高陽投諸海外之野以為夷狄况一父之子各易其姓而遂使之男女相及是率天下而為夷狄禽獸也豈理也哉書稱帝堯克明俊德以親九族使堯舜果同出於黃帝如史記之世系則堯之視舜為同高祖之族為羣從玄孫之行正九族之內也舜在九族之內為父母弟所惡屢置於死耕稼陶漁而堯不一顧省豈足謂之親睦九族迨四岳明揚又直妻以二女豈足謂之克明俊德以天下之大聖人推而納諸天下之大夷狄禽獸則史記世本誣陷聖人之罪不可勝誅矣然則堯舜之不同出於黃帝以書決之書無明文以堯之妻舜決之也或者又曰堯舜之不同出黃帝若前所云固決矣傳

稱有虞氏禘黃帝而郊嘗祖顓頊而宗堯何也曰此亦小戴叔國語之言而又失之者國語論禘郊祖宗皆以其有功於民而祀之初不論其世也故注者謂虞以上尚德夏以下親親戴氏祭法易其前後故讀者不覺耳此朱子固嘗言之矣無已則又決之於書乎書稱舜格于太祖即受終于堯之祖也稱禹受命于神宗即舜宗堯之廟也其禘黃帝其郊嘗即宗堯之意耳是以有虞子孫猶郊堯而宗舜以天下相傳則有天下之大統焉有虞氏受堯之天下則宗堯宗堯則禘郊堯之宗祖計堯以前亦或有然者矣況國語固云禘郊祖宗與報為五則禮固有並行而不相悖者近世有為之說者曰祖考來格虞賓在位此有虞祭顓頊報幕以至馨粢之祖考也胡氏大意國語所謂祖顓頊與有虞氏報焉者也禘黃帝郊嘗宗堯書所謂文祖神宗舜受堯之天下故宗堯為宗而祖堯之祖也路史大意大傳所謂帝入唐郊以丹朱為尸

者也祖顓頊報幕以至瞽瞍者一家之私親也禘郊宗堯者天下之公議也然韶之為樂正以紹堯而得名則祖考來格者即文祖神宗之謂而虞賓在位者安知非丹朱之在尸位乎况禘郊祖宗報五者各有所尊自不相厭而虞賓之位亦不相妨也故曰以下相傳則有天下之大統焉至商周以征伐革命始與古異而諸儒之論亦始膠矣

慎徽五典納于百揆

慎徽五典五典克從納于百揆百揆時叙左傳太史克曰昔高陽

氏有才子八人蒼舒隤鼓禱戲大臨厖降庭堅仲容叔達齊聖廣淵明允篤誠天下之民謂之八愷高辛氏有才子八人伯奮仲堪叔獻季仲伯虎仲熊叔豹季狸忠肅共懿壹慈惠和天下之民謂之八元此十六族也世濟其美不隕其名以至于堯堯不能舉舜臣堯舉八愷使主后土以揆百事莫不時叙地平天成舉八元使布

五教于四方父義母慈兄友弟恭子孝內平外成故虞書數舜之功曰慎徽五典五典克從無違教也納于百揆百揆時叙無廢事也高陽頊也氏謂其朝代才子謂高陽氏之世其故家遺族也高辛氏才子之云亦然故總謂之十六族或者不知遂真以為二帝之子則高陽八子何其壽而高辛氏之八子豈果堯之庶弟與

賓于四門流凶族殛鯀于羽山放驩兜于崇山

莊子釋文謂堯六十年放驩兜于崇山六十四年流共工于幽都六十六年竄三苗于三危按賓于四門舜歷試之時鯀考績弗成之明年也鯀無成功舜臣堯舉黜幽之典於是羽山之貶驩兜之比周固上亦並黜之至於三苗就竄疑未能若是速也所以書叙四罪總於攝位之季太史克以舜賓四門殛鯀放驩兜故併以流四凶族繫之兩事之前後舊必有考然四罪之

行皆堯七十載舜登堯之後非六十年間事也
意者六字之訛與今追正其訛繫之七十年以
後

賓于四門四門穆穆

左傳太史克曰舜臣堯賓于四門流四凶族
渾敦窮奇檮杌饕餮投諸四裔以禦魍魎

螭魎山林異氣所生為人害者古者聖人為民驅其龍
蛇惡物而處之平土故四裔無人之境螭魎聚焉故虞
書曰賓于四門四門穆穆無凶人也 程子曰四凶之
才皆可用堯之時聖人在上皆以才任大位而不敗露
其不善之心堯非不知其不善也然則聖人亦不得而誅
之及帝舉舜于匹夫之中而授之位則是四人者始懷
憤怨不平之心而願其惡故
得以因其迹而誅竄之也

履祥按太史克叙四凶之辭疑多溢惡蘇氏古
史亦謂左氏所謂皆後世流傳之過今故畧之

七十有二載舜納于大麓使禹平水土益掌火

棄教民播種契為司徒

書叙納于大麓為舜歷試之終事今係之歷試

之三年無繇以七十載殛死至是禹三年之喪畢而舜舉之也大紀命禹益棄皆係之此年今從之或曰此時方舉禹則蘇殛之後禹未舉之前三年之水孰治之與太史克固曰舉八愷使主后土矣但不如舉禹之專掌爾一云納于大麓蓋納于泰山之麓使之主祭也烈風雷雨弗迷百神享之也蓋堯時曾有風雷之變使舜禱之泰山而息也按淮南子外紀亦言堯有大風之變今不敢信用且依史記蘇氏之說

納于大麓烈風雷雨弗迷

淮南子曰四載舉舜而薦之堯堯妻以二女以觀其內任以百官以觀其外既入

天麓烈風雷雨而不迷

太史公曰堯使舜入山林川澤暴風雷雨舜行不迷

蘇氏曰洪水為患堯使舜入

山林相視原隰雷雨大至衆懼失常而舜不迷其度量有絕人者而天地鬼神亦或相之與孟子曰天下之

生久矣一治一亂當堯之時天下猶未平洪水橫流記濫於天下草木暢茂禽獸繁殖五穀不登禽獸偪人獸

蹄鳥跡之道交于中國堯獨憂之舉舜而敷治禹舜使益掌火益烈山澤而焚之禽獸逃匿禹疏九河滄濟漂

決汝漢排洄泗然後中國可得而食也當是時也禹八年於外三過其門而不入后稷教民稼穡樹藝五穀五

穀熟而民人育人之有道也飽食煖衣逸居而無教則近於禽獸聖人有憂之使契為司徒教以人倫父子有

親君臣有義夫婦有別長幼有叙朋友有信放勳曰勞之來之匡之直之輔之翼之使自得之又從而振德之

履祥按洪水之為患也堯使舜治之舜於是使益掌火禹敷土稷教稼穡矣舜使禹治之禹於是暨益奏

鮮食豎視秦艱食矣二聖人之規模其視鯨之方命祀族者不其相遠乎故觀書者必得聖人之規模焉又按孟子稱天下之生一治一亂則是氣化消息固有定勢矣獨不闕諸人事與曰朱子固曰氣化盛衰人事得失反覆相尋理之常也大抵氣化有盛則必有衰人事處盛則必有失此一治所以一亂也氣衰則必復盛人事失則必復變此一亂所以一治也惟聖人在上則能以道御氣治亂此所以常盛常治而無衰亂也古今之言堯舜者皆曰極治之時而不知帝堯乃善制亂之主何則帝堯治天下天下雍熙者至是六十餘年氣化可謂極盛天下可謂極治矣盛則必衰惟其人事無致亂之因故散而為子朱之不肖洪水之積流四罪在朝聖人在下是亦一亂矣惟帝堯善於制亂故水之為災也則敷治子之不肖也則與賢舜禹並興四罪終去所以處亂而迄不害其為治也然則世皆以堯為極治之主愚獨謂堯舜皆

善治亂之君後之為
君者無徒曰氣數云

丙辰七十有三載薦舜于天舜受終于文祖

帝曰格汝舜詢事考言乃言底可績三載汝陟帝位舜

讓于德弗嗣帝曰咨爾舜天之歷數在爾躬不允其讓也允

執其中授之以治天下之道也四海困窮天祿永終戒之也子王

舜如此之詳而讓德弗嗣之下無再命之辭巽位之際亦無丁寧告戒之語何也按論語堯曰篇首二十四字乃二典之脫文也 正月上日受終于文祖堯老而舜攝也堯終其事而舜受之也

在璿璣玉衡以齊七政以玉為璣以象天體之運轉以璿珠飾之以象星辰之位次以

王為橫簡推其分度時節以窺天而與璣合羲和之法至是益密後世渾天儀象蓋其法也朱子曰渾天說曰天之形象似鳥卵地居其中天包地外猶卵之裹黃圓如彈丸故曰渾天其術以為天半覆地上半在地下其天居地上見者一百八十二度半藏地下亦然北極出地上三十六度南極入地下亦三十六度而嵩高正當天之中極南五十五度當嵩高之上又其南十二度為夏至之日道又其南二十四度為春秋分之日道又其南二十四度為冬至之日道南下去地三十一度而已是夏至日北去極六十七度春秋分去極九十一度冬至去極一百一十五度此其大率也其南北極持其兩端其天與日月星宿斜而迴轉此必古有其法遭秦而滅漢武帝時落下闔軒于妾人始經營量度之宣帝時耿壽昌始鑄銅而為象宋錢樂又鑄銅作渾天儀衡長八尺孔徑一寸璣徑八尺圓周二丈五尺強轉而望之以知日月星辰之所即璿璣玉衡之遺法也歷代以

來其法漸密本朝因之為儀三重其在外者曰六合儀
平置黑單環上刻十二辰八千四隅在地之位以準地
面而定四方側立黑雙環背刻去極度數以中分天瘡
直跨地平使其半出地上半入地下而結于其子午以
為天經斜倚赤單環背刻赤道度數以平分天腹橫繞
天經亦使半出地上半入地下而結於其卯酉以為天
緯三環表裏相結不動其天經之環則南北二極皆為
圓軸虛中而內向以挈三辰四遊之環以其上下四方
於是可考故曰六合次其內曰三辰儀側立黑雙環亦
刻去極度數外貫天經之軸內挈黃赤二道其赤道則
為赤單環外依天緯亦刻宿度而結為黑雙環之卯酉
其黃道則為黃單環亦刻宿度而又斜倚於赤道之腹
以交結于卯酉而半入其內以為春分後之日軌半出
其外以為秋分後之日軌又為白單環以承其交使不
傾墊下設機輪以水激之使其日夜隨天東西運轉以
象天行以其日月星辰於是可考故曰三辰其最在內

者曰四遊儀亦為黑雙環如三辰儀之制以貫天經之軸其環之內則兩面當中各施直距外指兩軸而當其要中之內面又為小窾以受玉衡要中之小軸使衡既得隨環東西運轉又可隨處南北低昂以待占候者之仰窺焉以其東西南北無不周徧故曰四游此其法之大畧也儀禮經傳通解歷象篇曰渾天儀唐貞觀中李淳風為之開元中浮屠一行梁令瓚又為之宋太平興國中張思訓創為元祐中蘇頌更造其法尤密置渾儀於上以仰觀置渾象於下以俯視樞機輪軸

肆類于上

帝裡于六宗望于山川徧于羣神

朱子曰類裡望皆祭名類謂非常祀而祭

告于天其禮依郊祀為之上帝天也裡精意以享之謂宗尊也所尊祭者其祀有六祭法曰埋少牢於泰昭祭時也相近于坎壇祭寒暑也王宮祭日也夜明祭月也幽宗祭星也雩宗祭水旱也山川名山大川五嶽四瀆

之屬望而祭之故曰望羣神謂丘陵墳衍古昔
聖賢之類言受終觀象之後祭祀以攝位告也
輯五瑞

既月乃日覲四岳羣牧班瑞于羣后

合五等諸侯朝攝于都各執命圭璧

為信以合符于天子盡正月皆至于是日日覲見四岳九牧以察問五等諸侯之政班還其命圭璧如新受命也

七十有四載巡狩

舜以攝位初年輯五等諸侯盡正月皆至其二月乃日日

覲四岳羣牧考察諸侯以還其瑞則二月未暇巡狩也故逾歲而巡狩今附于攝位之明年

歲二月東巡狩至于岱宗柴望秩于山川

禮記作柴而望祀山川蓋

古者祭山埋之祭川沈之今於東岳之下祀東岳而及東方山川不能徧埋沈也故柴而望祭取其祭之旁達

也舊說柴句謂燔柴以祭天古者祭天必於郊有大事特告則放郊禮而謂之類天子將出類于上帝未聞至岱宗而始祭告也餘三岳皆如岱禮則一歲巡狩而肆四祭天不已瀆乎當從禮記以柴望秩于山川為句肆

覲東后五玉三帛二生一死贄

五玉至贄舊在修五禮之下朱子謂當在覲東

后之下蓋東方五等諸侯及公侯之子附庸之君與卿大夫命士贄見之儀等也聖人制為覲享之禮五玉三帛二生一死皆取服食器用而已古時多玉故公侯以玉為贄以共天子之器用賜予古者玄衣纁裳黃亦為裳故侯之世子執纁公之孤執玄附庸之君執黃以共衣服卿羔大夫雁士雉以共飲食也羔羊舒雁二物皆可以生得士異於庶人故執雉取其文也而雉不能生得故以死者為贄可以見聖人制禮詳密而簡易也如此

協時月正日同律度量衡修五禮如五器卒乃復

朱

曰時謂四時月謂月之大小日謂日之甲乙諸侯之國有不齊者則協而正之也同審而一之也律謂十二律黃鐘太簇姑洗蕤賓夷則無射六律為陽大呂夾鐘仲呂林鐘南呂應鐘六呂為陰凡十二管皆徑三分有奇空圍九分而黃鐘之長九寸大呂以下律呂相間以次而短至應鐘而極焉以之制樂而節聲音則長者聲下短者聲高下者則重濁而舒遲上者則輕清而剽疾以之審度而度長短則九十分黃鐘之長一為一分而十分為寸十寸為尺十尺為丈十丈為引以之審量而量多少則黃鐘之管其容子穀秬黍中者一千二百以為侖而十侖為合十合為升十升為斗十斗為斛以之平衡而權輕重則黃鐘之侖所容千二百黍其重十二銖兩侖則二十四銖為兩十六兩為觔三十觔為鈞四鈞為石此黃鐘所以為萬事根本諸侯之圖其有不一者則審而同之也時月之差由積日而成其法則先粗而後精度量衡受法於律其法則先本而後末故言正日

在協時月之後同律在度量衡之先立言之叙蓋如此也五禮吉古軍賓嘉也修之所以同天下之風俗如同也五器即五禮之器卒乃復者舉祀禮覲諸侯一正朔同制度修五禮如五器數事皆畢則不復東行而遂西向且轉而南行也今按如五器即禮記所謂考制度衣服正之之類是也

五月南巡狩至于

南嶽如岱禮八月西巡狩至于西嶽如初十有一月朔

巡狩至于北嶽如西禮歸格于藝祖用特

朱子曰南嶽衡山西嶽華

山北嶽恒山二月東五月南八月西十一月北各以其時也格至也言至于其廟而祭告也藝祖疑即文祖或曰文祖藝祖之所自出未有可考特特牲也謂一牛也古者君將出必告于祖禰歸又至其廟而告之孝子不忍死其親出告反面之義也王制曰歸格于祖禰鄭注曰祖下及禰皆一牛程子以為但言藝祖舉尊爾實皆

告也但止就祖廟共用一牛不如時祭各設至於其廟也二說未知孰是今兩存之

五載一巡狩

羣后四朝敷奏以言明試以功車服以庸

林氏曰天子巡狩則有協

時月以下等事諸侯來朝則有敷奏明試以下等事文中子曰舜一歲而巡四嶽兵衛少而徵求寡也

履祥按李氏心傳辨周禮五嶽謂周都豐鎬則華山乃中嶽崧高不得為中嶽據爾雅河西嶽河南華河東泰江南衡則崧山乃西嶽而華乃中嶽爾崧高之為中嶽蓋東遷之後也今以此說推之禹貢冀州自有泰嶽今猶謂之霍泰山則堯都冀州蓋以泰嶽為中嶽爾雅河西嶽周禮雍州其山鎮曰嶽山即禹貢岍山一名嶽山又名吳嶽今在隴州者是也然則唐虞五嶽當以岍為四嶽泰嶽為中嶽而東岱南衡北恒爾衡山最遠黃帝以潛霍為山之副然則秦以岍為西嶽漢武徙衡山之神於霍山歷代加封岍山多

以西嶽為言蓋有自來矣虞書獨東嶽稱岱宗而南
西北三嶽不名蓋當時巡狩四嶽取肆覲群后東里

之宜爾不必拘于嵩華之為嶽
也敢因李氏之言以傳其疑

流共工于幽州

流共工于幽州幽州北
裔也當是遼東之地

七十有六載窳

三苗于三危

窳三苗于三危西裔也隋書曰黨項羌者
蓋三苗之後也其種有宕昌白狼皆自稱

獼猴種東接臨洮西平西接葉護南北數千里三危山
名舊云沙州燉煌縣東四十里卑兩山是然三危乃因

山以名其地不必拘曰居北山也 呂刑曰若古有訓

蚩尤惟始作亂迺及于平民罔不寇賊鴟義姦宄奪攘

矯虔苗民弗用靈制以刑惟作五虐之刑曰法殺戮無

辜爰始淫為劓刑殛黜越茲麗刑并劓罔差有諱民與

胥漸泯泯禁罔中于信以覆詛盟虐威庶戮方告無

辜于上帝監民罔有馨香德刑發聞惟腥皇帝哀矜

庶戮之不辜報虐以威過絕苗民無世在下乃命重黎
絕地天通固有降格楚語曰少皞之衰也九黎亂德
民神雜揉不可方物夫人作享家為巫史無有要質民
瀆齋盟無有嚴威禍災荐臻顛頊受之乃命南正重司
天以屬神火正黎火當作北司地以屬民使復舊常
無相侵瀆是謂絕地天通其後三苗復九黎之德

履祥按諸儒言書者稱苗民繼蚩尤之暴而楚語稱
三苗復九黎之德孔安國遂謂蚩尤為九黎之君夫
蚩尤炎帝之末諸侯也九黎少昊之末諸侯也其時
相去遠矣孔氏合而言之故說者疑辨特詳然皆不
得書之意夫呂刑之書為訓刑者也則推所以立刑
之由楚語觀射父為絕地天通而言也則推巫鬼之
由推立刑之由則本蚩尤之為亂推巫鬼之由則述
九黎之為昏上古之世其民淳朴在下無罪在上無
刑至蚩尤始為亂迨及平民無不冠賊鷓義奸究奪
攘于是聖人矯正而度劉之比刑之所為作也刑以

制亂非有國者所尚也不得已而後用之爾而有苗
遂並刑以為虐民始有不得其生者矣於是罔中于
信以履詛盟而誣祝之事與焉巫祝之事蓋九黎之
遺習也呂刑楚語所指不同學者多合而言之其失

久矣

象以典刑流宥五刑鞭作官刑扑作教刑金作贖刑眚

災肆赦怙終賊刑欽哉欽哉惟刑之恤哉

朱子曰象如天之垂象示

人典常也示人以常刑所謂墨劓剕宮大辟五刑之正也所以待夫元惡大憝殺人傷人穿窬淫邪凡罪之不
可宥者也流流遣之使遠去宥寬也所以待夫罪之稍
輕雖入于五刑而情可矜法可疑與夫親貴勳勞而不
可加以刑者則以此而寬之也鞭木末垂革官府之刑
扑夏楚學校之刑皆以待夫罪之輕者也金罰其金也

贖贖其罪也所以待夫罪之極輕雖入于鞭扑之刑而情法猶有可議者也此五句者寬猛輕重各有條理法之正也肆縱也青謂過誤災謂不幸若人有如此而入於刑則又不待流宥金贖而直赦之也怙謂有恃終謂再犯若人有如此而入于刑則雖當宥當贖亦不許其宥不聽其贖而必刑之也此二句者或由重而即輕或由輕而即重蓋用法之權衡所謂法外意也聖人立法刑刑之本末此七言者大畧盡之矣雖有輕重取舍陽舒陰慘之不同然欽哉欽哉惟刑之恤之意則未始不行乎其間也蓋其輕重毫厘之間各有攸當者乃天討不易之定理而欽恤之意行乎其間則可以見聖人好生之本心也

流共工於幽州放驩

兜於崇山竄三苗於三危殛鯀於羽山四罪而天下咸

服

書叙四罪在舜攝位之末蓋作書者紀舜象刑之法與其恤刑之意因記二十八年之間所刑者四人而

已外是無刑者是則因而係諸典刑之下非攝位季年之事也若果季年之事則崇鯀羽山之殛稽誅于三考之後而追罪于三十年之餘也且是時禹已成功而罪繇人情之必不然者而謂聖人為之手

八十載禹告成功

按孟子稱禹八年於外而唐虞之法九載三考大紀載禹

成功于八十一載之間蓋自七十二載舉禹至是九年矣其後夏史叙禹之功是為禹貢之書今附于此云史記漢史皆稱禹治水十三年蓋本作十有三載乃同之文此特兗州貢賦始同爾禹貢夏史之追書故及十有三載之事其實告成則在此年也

禹貢

夏史叙禹平水土之功總以貢名識其成也每州有賦有貢有篚而貢則夏后氏田賦之總名也故

以為名禹貢叙水土之事在唐虞之際禹謨叙功護之事則在有虞之時舊皆名夏書以夏史之所述也夫子

定書升禹謨于虞書以著三聖相傳之道
冠禹貢於夏書以明大禹有天下之本也

禹敷土隨山

刊木奠高山大川

數如數治之數有布置周徧之義禹
治九州非一手足之為烈亦布置規

畫之有道耳隨山刊木禹功之始奠高山大川禹功之
終其始洪水氾濫草木繁興禽獸逼人種藝無地禹於
是隨山刊木使益掌火烈山澤而焚之奏庶鮮食且使
民居高種藝以給粒食又以升高望遠規畫疏導其後
懷襄之患悉定則又定其高山大川以為每州表鎮望
祀之典焉此禹功之終也又古者州域既廣國小而多
地無定名凡禹貢所書山川皆因山以名其地非
謂專導其山也此讀禹貢之凡例今表見於此云冀州
冀為帝都故為九州之首不言所至春秋王者無外之
義也九州豫為中帝畿實跨冀豫然自唐虞都冀天下
遂指冀為中州如楚詞謂中州為冀州是也聲教自冀
四達則自冀以北所及固廣矣此異日并幽所以分也

冀之為州三面皆河水患特甚蓋河自崑崙東北流阻
陰山一帶則折而南流為冀西河至華陰又折而東流
為冀南河至大伾折而北流為冀東河自西河出孟門
之上南河壅砥柱之西東河旋於大陸之野此冀州水
患所以為甚也而充在冀東又為下流之衝故先冀而
及充自禹載壺口治梁岐闢龍門疏砥柱豬大陸而冀
之患息播為九河使之北流釀為灘溧使之東殺通于
淮泗使之甚則可以南泄於是充之患平而青徐次第
皆平矣冀州之境今之河東

既載壺口

戴始事也壺口山名今在慈州

志卿縣冀雍之文夾河而南皆山也壺口蓋受河之口龍門則河南出之門也

治梁及岐

梁呂梁山

也在今石州離石縣北呂不韋謂呂梁未闢河出孟門
之上春秋梁山崩傳謂壅河三日不流水經注謂呂梁
之山巖層岫紆澗曲崖深巨石崇竦壁立千仞河流激
盪震天動地蓋大禹所闢以通河也孟門亦在石州今

有孟門闕岐孤岐山也在今汾州界休縣勝水所出統為西山古河逕之險阮治二山以廣河道也舊說雍之梁岐者非九州凡山之言治者或水道之衝有疏開之功也或表山以該水土也言藝者剪其翦鬱與民種藝也傳所謂以啟山林也言旅者祭之以為其州既修太之鎮望記所謂民所瞻仰取材出雲為兩者也

原至于岳陽

修治也記曰禹能修縣之功蔡氏謂因其舊而修之也太原在今太原府榆次縣鄭

漁仲謂乃今平定軍按平定軍亦未以太原府廣陽樂平二縣置爾雅高平曰原河東視天下最高率多山險今太原府亦險阻但榆次與平定諸處為高平爾岳即泰嶽今晉州霍邑縣霍泰山也山南曰陽今晉州岳陽縣也汾水出太原諸山經晉州蔡氏謂此條為治汾水而言然禹經理水土濬吠滄畫井疆物土宜凡事蓋並手皆作不獨汾也

單懷底績至于衡漳

單大也懷地名太行為河北脊其山脊諸州皆

山險至太行山盡頭地始平廣田皆腴美俗謂小江南
古所謂軍懷也即今懷州其地亦有懷水入河衡漳即
今漳河有兩源其一出今平定軍樂平縣少山者曰清
漳其一出潞州長子縣發包山者曰濁漳沈存中謂凡
二水合流而有文者皆名漳鄴道元以濁漳為衡水以
清漳東南流而濁漳橫入之也按唐志冀州以衡水名
縣而漳水在縣治之南一里洛州舊清漳名縣而其地
有衡漳瀆則非二名也漳河本入河自河徙之後漳自
至今滄州清池縣入海唐時有請以漳水備四瀆者以
其獨達于海也禹治冀州戴壺口治梁岐則冀之西
河患息修太原至岳陽則冀之中郊甸治軍懷底績至
衡漳則冀之東南水土平至于恒衛島夷則冀之東北
皆可知矣此神禹厥土惟白壤此辨地也白其色也無
塊曰壤言其性也顏師
古謂柔土曰壤周官大司徒辨十有二壤之名物而知
其種以教稼穡樹藝而草人又有冀種之法亦因其色

性而各異傳所謂先王物土之宜而制其利者也
先王辨地教民不失其宜故五穀熟而民人育

厥賦

惟上上錯厥田惟中中

賦者田所出穀米兵車皆是也禹貢田賦上中下三分而三之

中又三之為九等以人功之有多寡也其實則皆什一
諸州先田而後賦以賦之出于田也冀州先賦而後田
以賦之不專出于田也冀為帝都地大人衆天子所自
治鄉遂正軍羨卒必雄于外服粟米黍稷併與漆林雜
物並征之亦不別立貢篚總其數之入為九州第一但
聖人取民不盡其力又有時錯出于次等河東太行地
勢全體皆石土戴其上但壤
性柔細故其地為九州第五
恒衛既從大陸既作
恒水
恒嶽之北谷合于滹而入易衛出真定府靈壽縣古入
河今合于滹沱古書謂舜分衛水以北為并州又按滹
沱河出恒嶽諸谷而衛水與之合流恐恒衛既從即滹
沱為是大陸爾雅在九藪之數今邢州鉅鹿猶有廣河

澤唐杜佑李吉父謂今邢趙深三州皆大陸之士按地
說大河東北流過洛水千里至大陸為地腹蓋古河本
穿西山之麓以北流既出怙洛西山勢斷地勢平廣脊
上諸水鍾匯于此為藪河水泛溢又盤洄其間是為大
陸沈存中謂大陸皆濁泥所埋今為平土矣又按禹貢
諸州山澤地水皆叙厥田之上貢篚包匭皆叙田賦之
下未惟言入都水道耳冀為帝都不別出貢篚固矣而
恒衛大陸復叙於田賦之下何也此非治水施功之例
亦言入都水道因以見其成功爾蓋冀為帝都而自平
陽四達甸服之外東北最遠又限以太行之脊其北境
侯采則自恒衛入河其東偏則自大陸
入河其東北島夷則自碣石入河也

島夷皮服夾右

碣石入于河

島夷海島之夷冀東北邊之國如遼漢朝
鮮之地不附庸于青而徑屬於冀者也其

貢皮服爾雅

所謂東北方之文皮者夾旁行也右碣石
負海之山也碣石有二故有左右之名舊以右為太行

山之右非也右碣石在平州石城縣南舊為大河入海之處今河徙海淪碣石去岸五百里矣其山頂踵皆石頂又有大石如柱世名天橋柱云濟河惟兖州濟古丈其左碣石唐通典云在高麗界中作涕兖州西北界河東南跨涕其時黃河北流涕入河而南溢以東又北東入海爾雅所謂沛河之間為兖州自南定王五年河決而東漢孝文時河決東郡武帝元光中繼決瓠子又決于館陶遂分為屯氏河元帝時大河分流而屯河塞其後又決于平原而下流與漯一王莽末河遂行漯川涕水亦不復南出後世代有河決之患其後遂行涕水故道則兖州之境土無非河患淪徙之地漢王橫言往者天嘗連雨東北風海水溢西南出漫數百里九河之地已為海所漸則兖州之境北已海淪西又河徙南則涕狀其川澤源委咸非其舊矣今河北東路大名開德恩博德濱棣滄永靜京東之涕濮京西之滑小海以東距于營平皆故兖之地也九河既

道

河至大伍折而北流則充當其東又地平曠無高山之限而當河勢之衝禹於是播為九河以殺其勢爾

雅所謂徒駭大史馬頰覆釜胡蘇簡潔鈞盤高津是也言地理者多謂徒駭即溇沱在今滄州之清池馬頰鈞

盤在今德州之平昌胡蘇在今滄州之臨津覆釜在今瀛州之樂壽高津在今滄州之無棣簡即今大名之澗

溝潔在今滄州之南皮按河自大伍北流過大陸以北方播為九而今於魏瀛德棣之間便求其故迹遠矣據

王橫所言大風海溢即今小海碣石古河入海之處在今海中五百餘里則九河之地淪為小海久矣況自河

徙之後經流既息雷夏既澤今濮州雷澤縣西北雷夏枝流尚可尋乎波東西二十里南北十五

里計古雷夏澗沮會同晁氏曰爾雅水自河出為澗涕必大於今出為澗沮有楚音二水河涕之

別也然則河遷洑泆則澗沮不可復尋矣說者以為濮釋二水古入雷澤一說澗即返水張明謂禹開陰溝以

通河泗許氏謂汭受陰溝至蒙為澗水東入于泗即汭也汭今作汭沮即今澗水首受榮澤過應天今入南清河古時黃河亦入此路但經稱會同桑土既蠶是降丘古當合入汭後世導之入淮入泗爾

宅土

充土宜桑後世所謂桑間亦一證也今水平桑長而蠶事興矣充土無山洪水則民居高丘今土平

而降丘宅土矣

厥土黑墳

墳謂土性起發也

厥草惟繇厥木惟條

九州土田

連舉惟充徐揚三州又入草木一條蓋三州皆東方下流之地洪水泛濫草木不生至是始繇茂條長也厥

田惟中下厥賦貞作十有三載乃同

田第六賦第九貞字本下下字也古

篆凡重字者或於上字下添二充賦下下象從下二或誤作正通為貞又篆文貞字作厶與下下相類因以致誤學者不知古文說多不通竟地平下被害時甚水患雖平而水道居多人民鮮少蓋十有三年而治田與賦

始同他州厥貢漆絲厥篚織文黑鹵之地宜漆桑土宜絲篚者弊帛之類以篚盛貢之織

文者織絲成文也浮于濟潔達于河此充入都水道也涕入河而南出故浮涕可以達河

史記昌黎二渠引河其一潔也薛氏謂古潔自今開德府朝城縣受河而東入海故浮潔可以達河西漢末河并行

潔川其後河徙而潔亦不復存矣海岱惟青州青州於中國為正東故從東方之色其地東北

跨海西南距岱岱即泰山是名岱宗在今襲慶府奉符縣西北三十里其山特起東方為中國水口表鎮連延

而生諸山北即原山汶出其西溜出其東東即蒙艾為沂水諸源又東淮山淮水所出西南即泗水所出青州

之地即今青齊濟南淄濰登萊密東跨海而高麗北跨河而遼東但小海所淪則青之北境亦非全壤不獨充

然州為嶠夷既略首書嶠夷諸州無此例也但青州實跨海而有東夷兼堯命羲仲宅嶠夷以候

正東之景故時表於前或云即今登州之地畧者經畧之也

濰淄其道

濰出今密州莒縣東北濰

山至濰州昌邑入海淄出今淄州淄川縣東南原山今入北清河

厥土白墳海濱廣斥

濱古文作瀕青之土色白而性墳起其海瀕之地則廣大而斥鹵可煮為鹽故齊有魚鹽之利今登州千里長

沙是其地也

厥田惟上下

九州冀田第一青徐即次之後世所謂秦得百二齊得十二亦言其

地利之饒非獨形勢也百二十二猶言百倍十倍也

厥賦中上

田第三賦第四

厥貢鹽絺

海物惟錯岱畎絲臬鉛松怪石萊夷作牧

鹽廣斥所出絺細葛布也

海物非一種皆雜貢之岱畎泰山之谷其所出絲臬麻也鉛黑錫松泰山之名材怪石異石也如今萊之温石可為器今青州黑山紅絲石紅黃相參文如林木或如月暈如山峰如雲霞如花卉即古怪石也淄川梓桐山

石門澗石色若青金紋如銅屑理極細密亦奇石但不
如紅絲石之堅凡此諸品皆可為器用今取以為硯菜
夷菜山夷俗地宜畜牧亦取其
畜以貢今萊州之東是其地
厥筐屨絲廩山桑也其
絲堅韌宜絃

琴瑟故篚以貢之一說通上文謂萊
夷貢屨絲蓋今萊人猶謂之山繭云
浮于汶達于濟汶

出今襲慶府萊蕪縣原山古入沂今入北清河
兗州浮沂達河故青州止書達沂則達河可知
海岱及

淮惟徐州東至海北至岱南
淮今襲慶泗沂淮
揚連水海鄆宿西接單陳蔡頴之地淮沂

其久蒙羽其藝淮出今唐州桐柏山行千七百里至海
州入海徐之水以沂名者非一其出充

州泗水縣尼丘山過魯城南入泗者曾點浴沂之沂也
今海州沐陽縣有沂河口者周禮沂沐之沂也出沂州

新泰縣艾山西南至淮揚下邳入泗者此沂為最大即
禹貢之沂也蒙山在今沂州費縣羽山在今海州朐山

縣藝種菑也淮沂之水既平則蒙羽之墟皆可種藝矣

大野既豬東原底平

大野即鉅

野澤在今濟州鉅野縣唐鉅野屬鄆州石晉時温于梁山濼鄆今東平府即東原之地大野之水既豬則東原

之地底平厥土赤埴墳草木漸包

埴細而粘若今陶器之泥考工記傳埴老子埴埴是

也漸包古厥田惟上中厥賦中中

徐土粘埴而墳起故田視九州為第二當

時生聚人工未及故賦第五

厥貢惟土五色

貢土五色用以立社逸周書曰建太社于國中

其埴東青土南赤土西白土北驪土中央壘以黃土將建諸侯則鑿取其方面之土包以黃土直以白茅以為

侯羽畎夏翟

羽畎羽山之谷夏五色翟雉也左傳注南方曰翟雉古者車服旌旄以雉羽為飾羽

山出夏翟山以此得名

嶧陽孤桐

嶧山在兗州鄆縣名鄆嶧山九域志以為嶧山在淮揚下邳所

謂嶧陽者是山南曰陽孤桐者特生之桐也桐性虛特
生於山陽則清虛特異貢之以為琴瑟後世難得則取
凡桐之舊者為之謂桐不百年則木之生氣不
盡木生氣盡而後能與天地陰陽之氣相應也
泗濱浮

磬

泗水之濱浮生之石可以為磬如今硯石之取子石
者蓋石根不著巖崖而自特生者故謂之浮今下邳

猶有石磬山乃其遺跡又宿州亦有靈壁石但浮生者不可得耳

淮夷蠙珠暨魚

淮出唐州

其百餘里內尚淺而多潭有蠙珠潭今其地凡十四潭
而不復生珠矣魚既淮白魚若蠙珠玉磬古今風氣不
同蓋不厥篚玄纁縞玄黑赤色沈括謂今深紫類皂者
常有是古人以為上衣纁黑經白緯者

縞素繪也記有虞氏縞衣而浮于淮泗達于河

古文尚書作達

于荷說文引書亦作荷今俗本誤作河爾泗出兗州泗
水縣陪尾山有四源故謂之泗荷澤與涕水相通而泗

水上海可以通荷下可以入淮徐州浮淮入泗自泗達荷
青州書達于沂則達河可知故徐州書達于荷則達荷
可知河沂泗淮在古必有相通之道禹所以殺河流使
之可以南泄通南北使之可以朝貢灌輸後世河徒而
南會于河澤匯于鉅野分為南清河
并行于泗以入淮蓋亦其故道也
淮海惟揚州北至淮東

南至海即今淮南江南東西
二浙之地福建廣東亦屬焉
彭蠡既豬陽鳥攸居今彭蠡

陽湖自洪宮亭受江西嶺北江東諸水在江饒南康興
國之間至池州湖口入江漢志所謂湖漢九水者即是
也禹豬彭蠡廢其旁地為蘆葦以備浸淫故陽鳥居之
陽鳥雁也如漢築河隄去河各二十五里以防泛濫其
後民頗居作其間故河水漲溢之時動成漂沒以此知
神禹廢彭蠡之濱以居陽鳥其為民防患之意蓋深

三江既入震澤底定
震澤今太湖三江太湖之下三江入海者一說吳松江七十里分流

為三入海中為松江東南為東江北為婁江吳越春秋
所謂三江之口是也一說太湖之下元有三江吳松乃
其一陳述古在浙西嘗尋故道開其一以泄白水之患
蓋後世故道多湮雖松江尚有然亦淺故浙西歲有白
水太湖謂之震澤者震動也今湖翻是也在今湖州烏
程之北北入常州無錫晉陵東入蘇州吳江縣周回六
百五十四里按舊三江之說不一其可據者二一說謂
古名漢為北江江為中江則彭蠡之水為南江至揚雖
已合為一然以其三水合流謂之三江猶洞度九水俱
匯謂之九江也范蠡所謂吳之與越三江環之民無所
移謂俱在大江之南爾今通州福山鎮猶名三江渡是
也然三江既以彭蠡為一則上文既出彭蠡不應下文
又出三江且經文二既字對舉皆本效之辭彭蠡既豬
矣則陽鳥攸居三江既入矣則震澤底定是三江者乃
震澤下流之三江也北方之水河為大故凡水名皆以
河為總稱南方之水江為大故凡水名皆以江為總稱

然則三江之江不必疑為大江之江也今按揚州之境
嶺至柳度北枝趨數淺原水皆東流又自建嶺一枝轉
而北越介衛為歛嶺亘宣而抵建康其岡脊以西之水
皆西流是俱匯為彭蠡其岡脊以東之水南則浙江北
則震澤也彭蠡之水不豬則今江西江東諸州之水為
揚西偏之患震澤之水不泄則今浙西諸州之水為揚
東偏之患揚雖北邊患而於徐已書又雖中貫江而於
荆已書朝宗獨大江之南西偏莫大於彭蠡東偏莫大
於震澤一患既平則揚之上田皆治矣故特舉二湖以
見揚之告成若其南偏率是山險浙亦山溪計不勞施
功故餘篠蕩既敷厥草惟夭厥木惟喬篠箭竹蕩潤節
竹也爾雅東南

之美者有會稽之竹箭馬厥土惟塗泥厥田惟下下厥賦下上錯

揚江湖之區下流之地其土塗泥而其田反居第九古
人尚黍稷田雜五種故雖水潦旱乾而各有所収塗泥

之土其田獨宜稻不利他種故地為最下厥賦第七又
有時雜出於七等之上則人功亦稍修矣自唐以來則
江淮之田號為天下最
漕餉皆仰給于東南
厥貢惟金三品瑶琨篠簜齒革

羽毛惟木鳥夷卉服

三品金銀銅也瑶石之美似玉古
有瑶爵今瑪瑙水晶壽山石皆可

為杯器蓋瑤之類岷今岷山石是篠以為矢箭箛以為
管儀禮蕩在建鼓之間是也齒象齒革犀兕之皮羽翟
雉毛旄牛尾古為揚貢今嶺海之間有之凡此皆為器
服車甲旌旗樊纓之飾惟木惟與也木豫章之屬為夷
海島之夷卉服草服也
如今黃草蕉布之類
厥篚織貝
博物續志曰閩中多
木綿植之數千株採

其華紡以為布名吉貝南史言林邑等國出吉貝木薛
氏云織貝今木綿也或曰織貝島夷所貢如今南海諸
番皆以木綿為服謂之
搭布其細者則名吉貝
厥包橘柚錫貢
小曰橘大曰柚
惟荆揚有之踰

淮而北則為枳橘頌所謂受命不遷者也沈存中謂本草柚皮甘今所謂柚其皮極苦而橙皮甘古之柚蓋橙

云錫貢錫命則貢聖人不常以口腹之味擾民也沿于江海達于淮泗徐州已言淮泗

達荷故此但荆及衡陽惟荆州北抵荆山南跨衡山以言達于淮泗

漳縣衡山在今衡州之北九十里屬潭州湘潭縣荆江州即今荆湖南北路北接京西西侵夔峽南控廣西

漢朝宗于海蔡氏曰江漢合流于荆去海尚遠水道已安下流無壅奔趨于海猶諸侯之朝宗于

王九江孔殷九江洞庾也孔殷甚得其中也朱子謂國初胡祕直近世晁詹事陳冠之皆以九江

為洞庭按江海經亦云洞庭沅澧之水瀟湘之泉是為九江今按禹貢東至于澧過九江則是古者澧先入江

而後九江入也澧當在九江數外今考朱子文集及漢史及江陵新志更定九江源委一曰瀟江出道州營道

縣九嶷山亦名營水過零陵下與湘江合二曰湘江出
靜江府興安縣陽海山東北名鱗背東北至潭州入洞
庭三曰蒸江出衡州衡陽縣西會衡山諸源而下合于
湘以其水氣時盛故名為蒸舊說不在九江之數朱子
文集言九江云湖南有蒸湘之屬而記文亦云蒸湘之
會今入于此四曰濱江出武岡軍唐剏山又名邵陵江
亦名益陽江至益陽縣西北入洞庭五曰沅江出沅州
西蠻界中至辰州與酉江合據西漢志則沅水出牂柯
郡界故且蘭縣今屬播州是與牂柯江隔嶺而分者也六曰
洞庭且蘭今屬播州是與牂柯江隔嶺而分者也六曰
浙江出索縣東流與沅合七曰序江出辰州淑浦縣鄜
梁山西流與沅合八曰辰江出辰州西南蠻界中東流
與酉合九曰酉江出會溪城西山中至辰州東合沅辰
北流至鼎州東入洞庭此九江也但柳江亦一州之水
其源出嶺至柳城下始勝州又五十里與東今合而始
大北入湘江舊皆不在九江之數但不知其與漸序二

水孰為大小今不敢更有升降已上九江會為洞庭計
禹時九江入江會合未甚廣故未有洞庭之名其後會
聚日廣方八百里而洞庭山遂在其中故因 沱潛既道
山得名云今所謂荆湖南北路自是而分

爾雅江出為沱漢出為潛今江陵府松滋縣南枝江縣
北江分三十餘所下流復合曰沱離江公安縣有沱潛
港此沱之證也潛出今江陵府潛江縣漢志謂華容有
夏水首受江東入沔說者以為潛水華容今監利縣北
即潛 雲土夢作入 舊雲夢土作入太宗得古本尚書改
江縣 中沈存中鄭漁仲謂今監利玉沙景陵等處是江南為
夢左氏所謂田于江南之夢沈鄭謂今公安石首建寧
等處是然二氏之說皆在今江陵府之境但今德安府
有雲夢縣而荆門之長林縣岳州之巴陵縣亦皆有雲
夢司馬相如謂雲夢方八百里其所連亘固廣楚之數
澤不一後人既以雲夢兼稱故所在數澤皆謂雲夢爾

又按荊州之地中門卑濕江漢至此支分沮洳故藪澤
為廣今枝分為沱潛者既道則其沮洳為雲者皆為平
土為夢者皆
可作又矣 厥土惟塗泥厥田惟下中厥賦上上荆揚

皆塗泥性止宜稻故田為第八視楊稍高爾今世謂江
陵為魚稻之鄉其餘類此然兩賦入第三以近中土人
功修 厥貢羽毛齒革惟金三品托榦括柏荆貢畧與楊

也 所謂利盡南海也金次于楊而木加焉括古文作柎爾
雅柎一名櫂郭璞謂材中車輞榦括也材中弓弩之榦
周官所謂荆之榦是也括檜 礪砥砮丹礪砥石可用磨
也楊止言木荆又備言羣材 礪砥砮丹者粗曰礪細曰
砥今跗石是也弩者石可以為矢鏃今思播有之周初
肅慎氏貢楛矢石若家語孔子嘗以對陳侯石若之問
蘇氏謂孔子不近取諸荆梁而遠取之肅慎則荆梁之
不貢此久矣丹殊砂也今辰錦所出光明砂及溪洞老

鴉井所出尤佳 惟箇籜楛三邦底貢厥名 箇籜竹也趙宣子所

聖小而直陸璣謂葉如荆而赤莖似著三物皆中矢苛

鄭邦所貢又為名材三邦之名不傳考工記曰妣胡之

者唐志零陵貢芻芻蓋此類云 包匭菁茅 菁茅一茅三

江淮之間名陵之師責楚貢包茅不入無以縮酒朱子

謂古人醱酒不以絲帛而以編茅王室祭祀之酒則以

菁茅取其至潔包者直之匭者匣之也劉蕡謂辰州盧

溪縣包茅山一茅三脊今屬麻陽縣然鄂州山上亦有

之祥符東 厥篚玄纁璣組 爾雅一染謂之纁再染謂之

封取諸此 入為纁一說謂六八為玄古人玄衣纁裳璣珠生於水

類玉組辨絲以貫珠以為冠纓佩以貫玉帶以為組約

是三者皆 九江納錫大龜 尺有二寸以上謂之大龜龜

冕服所需 之神在甲故可以卜納錫神

也。浮于江，沅潛漢逾于洛，至于南河。荆之諸國或從江，或從沅，或從潛，以

入于漢，自漢入丹，河白水，河即踰山路入洛，達于南河。荆河惟豫州，豫於九州為中土，南跨海。

而抵荆山北，距南河即今東西南三京。穎許汝亳陳曹孟鄭唐隨襄均拱陝虢商鄧諸州之地。伊洛瀍

澗既入于河。世傳禹闢伊闕，今河南伊闕縣兩山相對如門，闕伊流出其間，北至洛陽縣南入洛。

洛出熊耳山，在商州上洛縣，今虢州盧氏縣。河南永寧縣皆有熊耳山，卽康節謂當以上洛者為是。瀍水出今

河南府河南縣穀城山，至偃師縣入洛。澗水出河南府澗池縣東北白石山，至河南縣入洛。洛至鞏入河。滎

波既豬，滎波孔氏以為一水。周官職方其川滎，維其浸波，澁則二水也。滂水入河而南出，溢為滎。今鄭

州滎澤是其處，爾雅永自洛出為波，而山海經曰婁涿之山，波水出其陰，北流注于穀。二說未知孰是。西漢末

汴水不復南溢而滎涸漢明帝使王景即滎故瀆東注浚儀名浚儀渠導荷澤被孟豬澤

在今曹州沛陰縣孟諸在今應天府虞城縣自荷澤至孟諸凡百四十里二水舊相通今荷澤自分南北清河

近時大河亦被孟諸併行灘水矣厥土惟壤下土墳墟其上者無塊而柔其下者或膏

而起或剛而疎如今轆轤之漚潭泥闕之沙隘皆所謂下土者厥田惟中上厥賦錯上

中田第四賦第二雜出第一唐虞甸服跨河而南故豫之賦與冀相埒計皆上上冀言上上錯豫言錯上中

特異文耳厥貢漆枲絺紵厥篚織纊錫貢磬錯紵以為布纊綿也餘見上

磬錯磬玉不可多琢以錯磨成錯鐵鐵為之今鑪是有用則錫命而貢浮于洛達于河華

陽黑水惟梁州東北距華山之陽西南抵黑水即今興元成都潼川夔州四路及松外諸戎東

西珂河諸蠻漢永昌岷嶓既藝

岷山江源嶓塚漢源說見下文岷山之下沃野

唐姚州今大理之地

千里與漢中俱號天府之土江漢沱潛既道

沱自今永康軍導江

之源既滌則岷嶓之墟皆種藝矣

縣大江分流入成都及彭蜀諸州至新津縣與大江復合此皆沃野灌注之利也水自漢出為潛然地志巴陵

宕渠縣有潛水西南入江今渠州流江縣也又漢中安

陽縣有潛谷水出西南北入漢今洋州真符縣也然此

潛自指西漢水出秦州清水縣亦名嶓冢山東南流徑

西和州南名犀牛江東合于嘉陵江以入江梁州不言

江漢以岷嶓沱潛源流之治見之

蔡蒙旅平

蔡山在今雅州嚴道縣南諸葛武侯征南夢周公於

此遂立周公廟因以周公名山蒙山在今雅州名山縣

東謂之蒙頂山雲霧常蒙其頂上合下開沫水徑其中

出為涸涯水沫即大渡河也旅祭和夷底績

雅州雅道也平謂蔡蒙之墟水土皆平也

和川即青衣水也夷人所居今為羈廬州有和良和都之名禹之治梁西則導江東則導漢而青衣大渡諸水又在岷山之南以東故禹於蒙山致平者為大渡河諸水于蔡山和夷致功者為青衣水諸源也青衣水與大渡河合至今嘉州南岸青衣山下

入于岷江青衣蠶叢氏之神也 廠土青黎廠田惟下

上厥賦下中三錯

黎細而疎政散而不實向聞吏牘謂成都土

疏難以築城蓋此也田 第七賦第八或七或九 廠貢璆鐵銀鏤砮磬熊羆狐狸

織皮

梁州產鐵漢書蜀卓氏程氏皆以治鐵富擬邦君銀白金鏤鋼鐵磬石磬漢於捷為水濱得古磬十

六枚蓋其土人所琢也熊羆狐狸四獸其皮可以為裘其毳可以織為金罽

西傾因桓是來

浮于潛逾于沔入于渭亂于河

西傾雍州山在今洮州臨潭縣西一百八十里

泚水出其北入河桓水出其東南今名白水江又一源
名墊江出洮及其南疊州岷州宕昌諸處東南合嘉陵
江以南入江嘉陵江者出大散關嘉陵谷西傾諸國雖
隸雍牧而水道則于梁有桓水之可因梁州通都水道
或自潛或自汚潛汚於渭無可通之道乃逾山而後可
以入渭經當言入于汚逾于渭如上文逾于洛之例今
本誤也蓋潛即西漢水汚即褒水自江沂嘉陵江而上
至大散關一至秦州天水則踰關可以入渭矣汚水出
京兆武功褒中南至褒城縣褒城鎮入漢斜水亦出武
功而北入渭漢時人上言通漕謂褒絕水至斜間百餘
里以車轉從斜下渭經自汚逾渭不言斜者
因大以見小也由渭入河絕流而渡曰亂

黑水西河

惟雍州

西南距黑水東北距西河即今永興秦鳳涇原
環慶廊坊麟府熙河等路及唐隴西西涼吐蕃

吐谷渾疊宕甘肅瓜沙等地

弱水既西

說見

涇屬渭汭

見下文導水
涇水出原州

百泉縣南流至京北府
高陵縣入渭屬注也

漆沮既從

漆出今同州白水縣
即漢志西洛水或云

出西夏界中歷保安廊同之境而入渭沮出今坊州昇
平縣北子午嶺與漆水合至同州朝邑縣東南入渭

豐水攸同

澧水出今京北府鄠縣
終南山東北流入渭

荆岐既旅終南惇物

至于鳥鼠

荆北條荆山在今耀州富平縣岐山在今鳳
翔府岐山縣旅定其祭秩也終南在今京兆

府南自西傾秦隴連亘雍南以至秦華故謂之終南惇
物在武功鳥鼠即渭源說見下文三山不言所治皆即

山以名其地自東而西舉其原隰底績至于豬野

原隰
詩所

謂度其原隰者在今仰州豬野在今涼州姑臧縣名休
屠澤魏太武伐涼謂姑臧城東西門外湧泉合于城北

其大如河其餘溝渠流入澤中其間乃無燥
地澤草茂盛按水土如此此禹所以底績也

三危既宅

三苗丕叙

沙州湫煌縣東四十里有早雨山一名化雨山有三峰甚高人以爲三危又宕昌羌卽三

苗之種其地有疊州山多重疊三危山有三重或在
地戎人凡山有三峰者便指以爲三危故漢志西指化
雨樊綽又指麗水之山但禹貢卽山以名地而自唐以
來地屬吐蕃難于考定聖人黜惡以遠爲罰經理則不
以遠爲間故于三危之地亦安定之
而三苗之在其地者亦知順叙矣
厥土惟黃壤厥田

惟上上厥賦中下

黃土之正色而又細柔故厥田爲九州第一後世號關中爲沃野謂之天

府蓋以此也然就其間較之亦惟涇渭澧漆之區最爲
沃壤西邊近沙磧北邊山狄故禹于雍州自終南至鳥
鼠則自東而西自原隰至豬野三危則自內而外賦出
第六生聚蓋不同也雍州之地至戰國廣漢富庶甲天
下漢衰地力耗自唐漸復然不能及東南至宋朝滋不
及然雍冀之非古西以夏北以契丹也揚州厥田下下

而賦下上自唐以來雖關中亦仰東南之粟至宋朝則軍國之需皆東給于東南矣生聚之繁於此為盛古今地力風土其不同蓋有由矣

厥貢惟球琳琅玕球玉可以為磬琳美玉琅玕青玉雍之西

有崑崙之玉其類非一皆球琳也其東有藍田青玉蓋琅玕也

浮于積石至于龍門西河會于渭汭渭為雍中巨流南則灋北則湮漆沮皆入之至西河為甚徑但自岍隴以西則皆浮

于積石河而下至龍門之上其入于西河者至華陰會于渭汭則浮渭而下者至是會于河可知也朱子按渭水集云邢恕奏乞下熙河路造船五百隻于黃河順流載兵下會州以取興州熙河路漕臣李復奏黃河過會州入韋精山石峽險窄自上垂流直下高數十尺船豈可過至西安州之東大河分六七道散流謂之南山逆流數千里方再合逆溜水淺灘不勝丹此聲若出必為夏人侮笑事遂寢朱子謂浮于積石至于龍門西河則

古來河道固可通舟矣而復之言如此何也履祥按
神禹導水渭川必有通道但天地人事每亦相固自三
代之衰河源皆謂戎狄不通朝貢至秦兼并而河源亦
在長城之外漢武帝極力開拓僅得河南空無匈奴開
朔方始得渠搜之地受休屠之降始得豬野之澤然自
積石以下源委未盡得也則故道湮廢其來久矣如蜀
南大渡河自吐蕃界經雅州諸部落至黎州為南邊要
害之地建隆三年平蜀以地圖來上太祖皇帝見大渡
之南城寨勞遠以玉斧畫河為界曰此外吾不有也此
後河流忽中陷五六十大澎湃如瀑船筏不通名為噎
口蠻人不復可以窺向殆天設險以限戎蠻也又如自
荆入蜀素號水險近數十年四川請于荆湖和糴運米
入蜀舟人貫習三峽遂為安流以此推之李復所奏河
道一則固恐出于吏民之託辭一則故道久廢岸谷變
遷亦恐非復織皮崑崙析支渠搜西戎即叙蘇氏謂此
禹跡之舊也

厥貢球琳琅玕之下然雍州西界黑水此諸國又在黑水之外故附于後以織皮冠之者此皆皮服之國貢織皮者也崑崙國名崑崙山旁小國也崑崙無定所而莊騷雜書皆云西王母所居為是則在今肅州酒泉郡南山石室玉堂珠璣鏤飾尚有事具晉書張駿傳太守馬爰所言是必古崑崙國也今西北別有崑崙都國去中國甚遠析支國名有析支河唐與吐蕃舊界也當在唐北度金滿縣西漢書西域傳言輪臺以東捷枝渠犂捷枝即析支渠犂即渠搜與然漢武帝開朔方又自有渠搜縣為漢北極界今屬夏州西戎班孟堅謂即西域

導岍及岐至于荆山逾于河壺口雷首至于秦嶽底柱

析城至于王屋太行恒山至于碣石入于海

此以下導山也岍岐

荆雍山也岍在今隴州吳山縣一名吳岳蓋虞周之世疑以此為西嶽故又有嶽山之名泝水出其西而南入

渭汾水出其北而東入涇岐荆說見雍州壺口而下九
山冀山也禹于帝都所親治導故冀山為多壺口泰嶽
碣石說見冀州雷首在今河中府河東縣雷水出焉山
臨大河北去蒲坂三十里底柱在今陝州陝縣三門鎮
大河中流有石如柱世言禹鑿底柱為之三門至今為
河流之險唐時又嘗鑿之不能殺其勢也然三門又分
天門地門人門惟地門不可過耳析城在今澤州陽城
縣山峰四面如城王屋在今孟州西北王屋縣沂水出
焉太行在今懷州之北連亘數州為河北脊以接恒嶽
程子謂太行山千里片石衆山皆石上起峯爾恒山北
嶽在今定州之北碣石一在平州之南一在高麗界中
至于碣石入于海一說謂恒碣之間諸水皆入于海亦
通禹貢一篇經緯脈絡舉天下山川分載九州北南
以緯之又合為導山導水西東以經之然後源委脈絡
可以指諸掌不爾則散而無統矣導所以下鄭王諸儒
分為三條四條條之說導所而下北條西傾而下中條

喘塚以下南條也列之說導岍而下正陰列西傾而下
次陰列喘塚而下次陽列岍山而下正陽列列之說比
條為密然皆不離地脉之說就地脉之說論之則西傾
喘塚岍山三列猶可通導岍而下一列為不可通蓋雍
之西其山隴自南而北冀之諸山皆又自北而南今北
條陰列所紀乃自西而東此其說之不可通者也言地
理者謂太行西南跨大河與商虢秦楚諸山相接諸山
總在山形之內則北條逾河之說固有此理然此亦大
地全體之常形爾大抵禹貢所書多是即山以名其地
故導山之說所以治水王也然隨山刊木禹功之始而
經叙導山又在導水之前而其導山又必自西而下則
聖人之規模次第槩可知矣蓋其治水之初利在奠民
擊鮮續食固是一時之急者然必自西而下者天下山
川相為綱紀必且自西徂東窮源極委廣覽天下之形
勢周知川源之險阻而後分畫賦功次第而舉故導山
乃所以為導水計也自其大者言之導岍而下為河漆

沮洳澤陸也西傾而下為渭源澧也為洛為淮泗也蟠
塚而下為漢沔潛三澨也自岷山而下為江沱九江彭
蠡也自其細而言之則固多矣如葦呀則汧汭可知及
岐則杜漆可知至荆則洽洛池瀕可知析城則汾絳可
知太行則懷沁淇池國蕩諸水可知恒出則恒衛潞滋
易桑乾可知至碣石則大小遼水可知導西傾則西黑
北洮南桓可知朱圉烏鼠至于泰華則西漢嘉陵褒斜
灞澹可知熊耳外方則丹白波穀伊潁可知桐柏至于
陪尾則汝渦濠泗沂可知導蟠塚至于荆山則漳沮潛
夏可知岷山之陽則青衣大渡馬湖涪黔江可知至于
衡山則九江諸源至于敷淺原則水之西入洞庭東會
彭蠡者又皆不言可知矣凡此諸說禹益兼舉並行不
可以一西傾朱圉烏鼠至于泰華熊耳外方桐柏至于
說斷也

陪尾

西傾至泰華雍山也西傾說見梁州一名嶺臺山
謂之西傾則其西地勢反下水皆西流入黑水

矣自此而東則洮出其北白水江出其南朱圉山在今
秦州伏羌縣一名白巖山秦華今華州熊耳外方桐柏
豫山也熊耳見下文外方舊說嵩山非也嵩高世名中
嶽安得反謂外方又與江夏內方相為內外哉按今河
南府伊陽縣伊闕鎮之西陸渾山據唐志一名方山蓋
古為外方春秋時秦晉遷陸渾之戎居此因名陸渾云
其山固嵩高之聯峰然謂為嵩高則非爾桐柏見下文
陪尾徐山也泗出陪尾在今襲慶府泗水縣桃虛西北
舊說拘于地脈以陪尾即漢志橫導嶓冢至于荆山內
尾山在安州安陸縣今屬信陽軍導嶓冢至于荆山內
方至于大別嶓冢說見梁州其形如冢荆山說見荊州
湖漑合潛江以通漢內方山漢志竟陵縣章山古文以為內
方今荊門軍長林縣也大別山在今漢陽軍漢陽縣其形如
鼉西有小別山漢水至此入江謂之沔口云岷山之陽至于衡山過九江至

于敷淺原

岷山梁州說見下文山南曰陽蓋岷山一帶南出為大渡之源又包青衣以東馬湖江黔

江諸源東出一枝為銜山其南行而東者為嶺包瀟湘之原而又一枝此向以至敷淺原故禹自銜山過洞庭

而至敷淺原也敷古文作傅傅通典註江州潯陽縣有蒲塘驛前有敷淺原原西有傅陽山朱子親至具處謂廬

山當其地而敷陽山乃在廬阜之西南則是敷淺原之陽也蓋廬山雖高而其中原田連亘人民莫居所以有

敷淺原之名後世匡俗結廬居之遂名廬阜而其支隴林麓猶存舊名爾導山而云過九江則導山即所以導

水可導弱水至于合黎餘波入于流沙此以下導水蓋總叙水之原委

沂源而及流即大以統細也弱水出吐谷潭界窮石山至甘州張掖縣合黎山下唐志言自合黎峽口西出即

居延澤經云至于合黎餘波入于流沙則居延乃古合黎澤爾水溢則波流沙也雜書言西域使者乘毛車以

渡弱淵豈非指此為弱淵與蓋弱水散漫無力不能負芥投之則委靡墊溺及底而後止惟皮船可渡其間一渡名娑夷水廣盡一矢用藤為橋極費工力以水沙不可施柱故用藤橋也流沙通典謂在沙州西八十里其沙隨風流行大抵西北之地多是沙磧史書所謂河沙諸國佛書所謂沙界恒河沙是也沙則水滲而下如沙州以西山北之地即連流沙弱水滲其下山南之地即連蒲昌海西域二河潛其中王元章云山東孫氏子自少為兵嘗乘皮船以渡久之又船行至南語蓋軍人不知典籍此非但渡弱水而西又循黑水而南矣又嘗問西域賈人識流沙否曰識之導黑水至于三危入于南非惟沙流石亦隨之流也

海漢志黑水出張掖雞山南至燉煌過三危山張掖今甘州燉煌今沙州也按黑水出雍之西而南入于南海為雍梁二州之西界蓋出崑崙之南谷也自積石西傾岷山青衣岡脊以西諸水天竺以東諸水皆入之故

黑水諸源亦非一唐樊綽云西夷之水南流而入于海
海者凡四曰區江曰西珥河曰麗水曰彌諾江其曰麗
水者古黑水也三危山峙其上程泰之以為麗水遠小
其所謂西珥河却與漢志葉榆澤相貫廣處可二十里
又漢滇池即葉榆之地漢武初開滇池其地有黑水祠
乃蜀之正西北距宕昌不遠宕昌即三苗之種又與叙
于三危者合履祥按二氏所考諸源非一其實則合
而為瀘水沈存中謂夷人謂黑為盧則瀘水即黑水也
蠻中固有西珥河亦有東珥河東西二珥皆因諸蠻而
得名安知其不指正流為西珥也唐以漢永昌故地置
姚州有西瀘蓋唐既以馬湖江為瀘故遂以姚州之瀘
為西瀘而雲南之地又有瀘南縣諸葛孔明征南中五
月渡瀘即此水也但兩漢志以瀘為溫字從省誤後人
失考爾故東漢志謂黑水祠為溫水者即此瀘水也今
按西南夷圖西珥河北合龍德河中合印鴻川南合導
江州其印鴻川東過葉榆之水入東合流名西珥河過

滇池則黑水池在焉東南與麗水合而區江亦合于麗水者此皆黑水諸源也故黑水經過雲南但名瀘水至交趾又名歸化江廣如江漢合流處東南入海而海道國自名黑水自在大理國東南大理即雲南也唐名南詔至宋名大理云 導河積石至于龍門南至于華陰東至于底

柱又東至于孟津東過洛汭至于大伾北過洛水至于

大陸又北播為九河同為逆河入于海

爾雅河出崑崙而說見崑崙者多

誕妄今不盡辨而說其總論積石在今積石畢其下蘭州皋蘭山石門黃河所出西南涵浸轉而東北流洮水北流入之又北而湟水會星海諸水入之其祁連山青海之水出浩疊東流合于湟水皆入焉皆崑崙北谷諸水也又北入北狄界中漸轉而東至唐受降城折而南流為冀西河天抵盤東山破之間千數百里禹載壺口

治梁岐皆為冀河已見冀州故此不書又南至河中府龍門縣之西山開崖澗自高而下奔放傾瀉聲如萬雷是為龍門南至華州華山之陰渭水入焉水勢撞擊地名潼關折而東流為冀南河至陝州陝縣底壅壅河中流世傳禹鑿二門以通之又名二門山又東至今孟州孟津河流始緩南北通津謂之孟津東過今河南府覃縣洛水入焉名為洛汭又東至澧州黎陽縣大伾山即今黎陽山也折而北流為冀東河至今冀之信都洛水入焉今名枯洛河是也又北至大陸誤見冀州又北播為九河說見兗州逆河之得名以潮至而水逆流也漢志作迎河謂迎接九河也亦通古河入海之地蓋在右碣石自周定王五年河始徙蓋自禹以前河決而北故播九驪潔以東殺之至漢河決而東故并行于潔而汭亦為河所并至宋則河決而南矣蓋古河北流既久濁流舊淤土膏日息則地形反高故河不復北趨漸次東決至五代晉漢時河遠梁山以東北入海至紹熙甲

寅南連大野并行泗水以入于淮於是有南北清河之分北清河即泲水故道南清河并泗水入淮今淮安之西二十里對岸清河口是也今梁山又塞而黃河遂西浸睢陽之境此古今之變也

流為漢又東為滄浪之水過三澨至于大別南入于江

東匯澤為彭蠡東為北江入于海

潘冢說見梁州漢水初出舊名為漾至漢

中為漢又一源名沔水故世以漢沔通稱然據書意則沔蓋褒水也又東為滄浪之水今均州武當之北四十里名滄浪州三澨即泌河其一源名三家河又一源名三里河西南流至鄧州東南合白河清水河入漢是名三澨也又東南至今漢陽軍大別山而南入江是名沔口自潘冢至此凡二千四百二十里東匯澤為彭蠡朱子以為多句東為北江入于海鄭漁仲以為羨文意禹治水之時與今不同方江漢未奠今江西諸水壅遏不

通滙而為湖雖非江漢所滙而勢實滙之史官追記固
易差夫而古書多是隱見互見若先叙江而滙澤在江
條之內似無甚少惟先叙漢以及彭蠡而後叙江如此
互見則首尾橫決及為失之中江北江想當時方言如
此以識江漢合流之別彭蠡源淺而與江漢
並列為北中南此恐亦當時東西之方言爾岷山導江

東別為沱又東至于澧過九江至于東陵東迤北會于

滙東為中江入于海

江出岷山岷山數百峯大西山為最大雪山三峰闊其後冬夏如爛

銀山一谷名鐵豹嶺者有西嶽廟廟下名羊膊石江水
正源也其西南分一源又為大渡河矣江至永康軍導
江縣諸源既盛遂分為沱東至眉州彭山縣復合于江
江南受青衣大渡馬湖江北受嘉陵江又南受黔江出
三峽而後東至于澧不書諸水以梁州蔡蒙和夷潛沔
皆互見而三峽天險北入都通道計不施工故不書東

至于澧過九江則禹時澧自入江而九江始入今則澧與九江俱匯為洞度而併入江矣故說者遂以澧亦在九江之數非也詳見荊州至于東陵今嶽州也陵也東迤北會于匯當作會于漢蓋江勢迤北處正受漢口若至彭蠡則東流久矣匯字必因上文而誤也禹于導江之初在荆為多蓋荆地卑濕沮洳江漢朝宗則揚自彭蠡而下不導沅水東流為濟入于河溢為滎東出于陶復致力矣

丘北又東至于荷又東北會于汶又北東入于海

沂出王屋

在今孟州王屋縣西北始發源山頂崖下曰沅水既見而伏東出于沅源縣湧為二源東源周圍七百步其深不測西源周圍六百八十五步其深一丈合流至溫縣是為沅水至懷州武德縣入河伏而南出溢為滎澤東出于陶丘北則今曹州濟陰縣又東至于荷說見豫州又東北會于汶在今東平府中都縣又北東入于海今

青州北海也沂水性沈勁太行為河北脊其西水皆西
流其東水皆東流沂出王屋本太行脊西之山而伏流
以東南出及既入河又伏橫而南出至王莽末沂入河
不復南出而河南無沂瀆滎自受河為浚儀渠然沂則
未嘗不復流地中今阿井煮膠為性鎮墜能清濁水吳
興陳氏渭今歷下凡登地皆水蓋皆沂水遇其下也

導淮自桐柏東會于泗沂東入于海

地理並見前章淮出桐柏初甚湧復

潛流三十里然後東馳亦尚淺其深處為十四潭至并
汝朝始大東會泗沂說見徐州今水之入淮者不獨沂
泗汝潁渦禹時不費治導故不書豫之沮隋唐之
汴今之黃河皆入淮矣自桐柏至海凡千七百里導渭

自鳥鼠同穴東會于澧又東會于涇又東過漆沮入于

河鳥鼠山說見雍州爾雅其鳥為鶖其鼠為鼯穴也三
四尺鼠在內鳥在外孔氏書傳共為雌雄張氏地理

記不為牝牡又其山一名青雀山渭
自鳥鼠至入河一千八百七十里
導洛自熊耳東北

會于澗澠又東會于伊又東北入于河
說見豫州北方諸水雖大河亦

水惟洛水不冰所以謂之溫洛一是天地之中二是其
北連山以障北風三則前人謂其中有礮石東漢都洛

陽以漢運火德故去水加
佳為雒後世仍從水名
九州攸同四隩既宅九山刊

旅九川滌源九澤既陂四海會同
此總結平治之功也九州攸同者言九州

之內經理無間也四隩既宅者言九州之外四海之隈
亦已安居也刊者去翦鬱驅猛獸興種藝也旅者定祭

秩立表鎮也九川凡九州之川不曰通流而曰滌源者
此所謂濬畎澮距川則田里無水潦壅塞之患也陂者

九州之澤有陂障無潰決也四海會同凡
水皆會同于海各得所歸無復橫流也
六府孔修庶

土交正底慎財賦咸則三壤成賦中邦

此總叙貢賦之典也府官府也

六府水火金木土穀之府也水土既平故六者之利無不興而六者之官無不舉也庶土交正底慎財賦此土賦也咸則三壤成賦中邦此田賦也庶土謂凡山澤丘陵墳衍原隰之土交皆也謂皆物其土地之所宜以任土事也底定慎謹也謂定庶土之所出謹財賦之所入則任民所宜貢土所有不强其無不盡其有也則等其土田為上中下而各定其什一之賦也中邦中國也古者田之可井者則整齊經理謂之中國其田不可井者則隘塞之地則以戎索故有九州內之夷狄蔡錫土姓氏曰土賦或及于四夷田賦則止于中國也錫土姓

祇台德先不距朕行

水土既平田制既定于是修封建之法各使守之錫土者賞其功勞

定其限制也錫姓者表其勲德輯其分族也封建之來固久經洪水之患則限制多不明有水土之功則庸勞

所宜賞此所以修封建之制也當時堯舜在上封建上
非禹所導而實出禹所畫所謂弼成五服者此漳以下
是也台朕指禹也如春秋我魯也禹既任天下之事則
率屬倡收儀刑百辟者固其職此所以祇敬我德以為
率先而其所行諸侯自無所違
距也周公謂作周乎先是也
五百里甸服百里賦納

總二百里納銍三百里納秸服四百里粟五百里米

此節

以下大約言遠近征役朝貢疆理之宜也服事也皆所
以供王事也五百里甸服自都城以外四面各廣五百
里商周所謂王畿千里者也甸田也千里之內天子所
自治是謂天子之田而畿內百姓所供事也賦納總者
其賦則禾連彙束之以納也禾以為糧彙以茨屋以餉
國馬以為薪芻凡雜用也銍者刈其穗也若今刈粟刈
黍者惟刈取其穗也其工省于總矣秸彙也服役事也
謂輸將之事也有穀曰粟無穀曰米總納繁重故惟百

里之內納之若二百里則去總而納銓四百里遠則簡
銓而納粟五百里又遠則去穀而納米近者重而遠者
輕重者粗而輕者精賦皆什一力則以遠近為輕重爾
古人九數有粟米均輸二法蓋本于此然獨三百里之
民納橐而不粟視他處為甚輕而有服役之事焉服役
獨在三百里者蓋酌五百里之中為轉輸粟米之賦也
史記謂古之善賈者百里不販樵千里不販糶以其遠
而重也然則聖人賦民必不使之四百里而負粟五百
里而負米矣故制為田賦自百里而止于二百里焉乃
若四百里粟五百里米不言賦納蓋不遠納于帝都亦
行百里或二百里而使三百里之民轉而輸之于都爾
夫三百里之民受遠郊之米粟而為轉輸力若勞而賦
則省又以見古者賦役不兩重此帝
王之良法而後世之所可行者也

五百里侯服百里

采二百里男邦三百里諸侯

甸服之外四面各百里為諸侯之服侯維也所以維

衛天子也一曰侯后也為民厚后也采朝廷公卿大夫元士食菜之邑也甸服千里固不以封而凡公卿大夫之食邑亦取于侯服則千里之畿天子專之後世不然故天子之地浸弱男邦小國也諸侯大國也內小國則弱有所依外大國則內無所逼而外足以禦秦氏曰甸服分為五等侯服分為三等外諸侯分為二等五

百里綏服三百里揆文教二百里奮武衛

侯服之外四面各五百里

為綏服綏安也內則侯甸外則要荒而綏服當其中故取綏安之義內三百里揆文教所以接華夏之教以撫要荒外二百里奮武衛所以禦要荒之變以安華夏優文儉武又有深意然內三百里揆文教則自此以內凡有國者文教可知外二百里奮武衛則自此以外凡有國者武備可知

五百里要服三百

里夷二百里蔡

綏服之外四面各五百里為要服要如裳之有要也所以綱統四裔也舊說要

約也其地遠于畿甸雜于夷狄雖州牧侯伯為之綱紀
控制而其文法則畧于中國矣又于其中分三百里為
夷二百里為蔡夷者易也取簡易之意蔡者
放也如蔡蔡叔之蔡有罪者則蔡放于此焉
五百里荒

服三百里蠻二百里流

要服之外四面各五百里為荒
服此為四遠蠻夷之地田野不

井人民不多故謂之荒所以經畧之者又簡于要服矣
其中三百里謂之蠻因其俗也二百里謂之流則有罪
者流徙于此如流共工於幽州是也蔡流皆放逐罪人
之地罪有輕重故地有遠近云右五服二面各二千
五百里四面相距方五千里雖幅員二萬里而夷蠻又
在其中聖人不務廣地如此然此亦大約限制以為朝
貢之節可畧之宜耳每服之中又自分
為二三節此周制九服之所由起也
東漸于海西被

于流沙朔南暨聲教訖于四海

漸如流民以仁之漸被
如被四表之被此統言

聲教之遠也聲如立之風聲也聲教則上行下效之謂禹迹所至不惟治水而已其身律身度觀民設教本末備舉東漸于海則教化漸淪于海西被于流沙則教化冒覆于流沙至于北雖止于恒碣南雖止于衡陽而南北地長聲教旁達不可為限故南北不言所至總而言之其教化則盡于四海矣聖人為後世計雖立為五服之限而教化所及咸慕無外故外禹錫玄圭告厥成功薄四海咸建五長以經理之焉

此告戒也錫如師錫之錫玄水色也禹既平水土故以玄圭為贄入覲而告成于帝焉一說禹治水獲玄玉之瑞故謂之錫禹不自居

以歸之帝而告成功焉
履祥按禹貢一篇蓋夏史之追書也夫既夏史之追書則紀成功之書耳夫既紀成功之書則禹之治水其先後次第規模不盡見於此而於此可以推見爾何者禹貢於九州獨冀州載修治之辭於上餘州則

皆曰某山既藝既菽某水既道既從某澤既豬底定
是皆記其成功耳其先後次第不盡見於此矣而謂
於此可以推見何也曰禹貢一篇分叙九州以經之
總叙山川以緯之每州之下奠山川豬藪澤而後繼
之以物土宜定田制又繼之以經賦法通朝貢其總
叙於後則列山川叙源委總成功定封建別限制同
教化是禹八年之間其先後次第經理規模廣大周
密本末備具蓋可想也而其先後次第則證諸禹所
自言者而尤可見禹曰洪水滔天懷山襄陵予乘四
載隨山刊木暨蓋奏庶鮮食此禹功之始也孟子所
謂龍蛇禽獸之害烈山澤而焚之者也此禹貢分叙
所以先於刊定諸山總叙所以先於導山是也禹曰
予決九川距四海濬畎澮距川暨稷播奏庶艱食鮮
食此禹功之中也孔子所謂盡力乎溝洫者也此禹
貢分叙所以定川澤辨厥土等田制總叙所以有導
川則壤成賦甸服等事也蓋禹之治水不但疏決河

志鑿阻澹川而已凡天下平土皆制其井畝疏為溝澮以達于川所謂畝澮者即田間之畝一同之澮也所謂溝洫者即一井之溝一成之洫也則是井田之制自禹定之此禹中間功庸最為周密至於所謂懋遷有無萬邦作乂所謂弼成五服至于五千外薄四海咸建五長則禹功之終也分叙之浮于某水達于某水總叙之六府孔修庶土交正迄于四海皆是也或曰書曰洪水滔天既曰滔天矣則禹之治水若何用功耶曰滔天云者當時方言形容其勢耳愚昔聞之家庭曰洪水滔天即如後世淫雨大水河決之災但堯末年連歲有此然彭蠡諸水而指為漢漚此則尤有可疑者也已釋而辨之矣抑蓋有天地自然之變者如河徙而南沂泗而淤而冀兗青豫徐之支流水澤皆易其源委甚至九河淪而為小海碣石陷而在海中此尤其變之大者也大抵天地之間山陵土石自有消長顧其消長之數甚長而人之年壽有限

則不及見其消長遂以為古今有定形爾山與土石且有消長而况水乎昔沈存中奉使河北邊太行而北山崖之間往往銜螺蚌之殼及石子積巨石壁如帶謂必昔之海濱今東距海已千里以愚觀之此即昔之河濱也所謂自東則至東海千里而遙者也夫以昔之河濱而今在山崖石壁之間即河日邊山日長石日凝蓋可知也此皆天地之間今人尚可考見之理其類非一而人鮮不謂迂者朝菌不知晦朔夏蟲不可語冰其非天地之謂矣然則禹貢地理古今之不同又安知其非天地之變遷消長若河碣之比耶或曰條列之說如之何曰予嘗疏于前矣王鄭分每章為條每段為列可爾若指為山勢之脉絡恐未然也夫天地常形固相為勾連貫通然其條理亦各有脉絡若以脉絡之可見者言之崑崙四垂而為海天下諸山皆起於崑崙而崑崙無定名地之最高山之所聚江河諸源之所出即崑崙爾崑崙之山綿亘糾繆

勾連盤錯其南為岷山而岷山最大其東北為積石諸峰其東為西傾朱圉鳥鼠諸峰其西北諸山尤為綿亘紛錯河之所以北弱水之所以西黑水之所以南皆是也惟江河渭漢行乎中國自崑崙而東北言之則自積石而北為湟水星海青海以至浩亶皆河源也又匈奴以東為陰山又東南自伐北雲朔分而南趨為北嶽以至太行是為河北之脊壺口雷首秦嶽析城王屋皆其羣峰河之折而南汾晉諸水之所以西入河涿易冠漳恒衛之所以東入海也分而東趨者行幽燕之北為五關之險以至營平而為碣石此北絡也自崑崙以東言之則東為西傾而洮水出其北入河恒水出其南入江又東為朱圉鳥鼠諸隴則為渭之源自渭源以北即交河源而北以東若岍岐若荆口諸峰涇水漆沮諸源也自渭以南即西傾而下諸峰亘為終南屹為秦華東北為穀陝東南為熊耳外方嵩高伊洛之源又南為桐柏淮源以達于

准西諸山此中絡也人自西傾朱圉而南分是為峰
冢漢源夾漢而趨者北則終南華熊諸隴南則蜀東
諸峰說者謂蜀東諸山皆嶓冢正謂其岡岫綿亘爾
又東則為荆山諸方此中絡之次也自崑崙之東南
言之是為岷山江源夾江而東者北支即西傾以南
嶓冢以西之脉為桓水西漢水嘉陵江諸源其南支
即南趨為蒙蔡諸山青衣大渡馬湖江諸源又東包
涪黔一盤而北為三峽其東出者包絡九江之源中
盤中為衡山其再盤而北為廬阜其嶺之東出者又
為袁吉章貢盱信諸江之源至分水魚梁嶺三盤而
北趨過新安時天目盡昇潤九再盤之間其水聚為
洞庭三盤之間其水聚為彭蠡三盤以東則南為閩
浙北為震澤此南絡也惟泰山則特起東方橫亘左
右以障中原此所以為異與大抵水者山之液故山
盤而水之源出焉此所以聚為川流之盛地道以勾
連為固故山東而水之流壅焉此所以資於疏闢之

功凡此其大約云爾或曰古今天下廣狹一也禹貢五服四距五千里而周制九服自王畿以外每方自為五千里何也或謂尺有長短則周尺不應半禹之尺或謂禹五服之外外薄四海不在其數周則盡外薄所至而經畫之此說為近然亦不應外薄之地與五服之地相半也攷之經文甸服方千里而曰五百里則凡所謂五百里者舉一面計之也若周官則曰規方千里曰王畿又其外方五百里曰其服則舉兩面通計之也是則禹貢所謂五百里甸服者乃千里而周官所謂外方五百里者乃二百五十里也至漢地志又言東西九千餘里南北一萬三千餘里則漢東西視禹貢幾一倍南北視禹貢幾二倍攷其所載山川又不盡出禹迹之外何也古者聖人制數周密其制方田之數以御田疇廣狹制甸服之數以御遠近高深方田之制行則自井畝徑遂之直積而為道路川澮截然直方無有迂曲故中邦之地雖廣而

里數則徑自秦漢開阡陌於是道里始迂遠矣此古今里數則徑自秦漢開阡陌於是道里始迂遠矣此古今於圓方圓出于方方出于矩矩出于九九故折矩以爲句句廣三股修四徑隅五禹之所以治天下者此矩之所由生也是則句股算法自禹制之蓋積矩以爲方田而句股以測高下淺深遠近此禹之所以理天下而弼成五服者也句股之數密則於山川迂回之處與道理曲折之間以句股之多計弦之直而得遠近之實大率句三股四弦直五以正五斜七取之自秦漢以來誇多務廣固盡外薄之遠其計道理又但以人迹爲數不復論句股弦直故漢之九千里大約準古六千五百里漢三千里準古一千九百七十一里而尺步長短之異制又不在此數此古今里數多少之不同二也至於禹貢外薄之地在五服之外而後世斥候所到盡在里數之內此其多少之不同又不在言者或者又曰冀在九州爲北堯都冀州

則自甸服之外北短南長五服之地北無所展而南有所棄則如之何曰隆古都冀政教四達則冀北之野生聚教訓必不如後世之為窮漠所以冀賦為九州第一而水平之後分為幽并其廣可知兼堯都平陽雖曰在冀自平陽以南渡河至陝於今地理三百七十五里正五斜七於古蓋二百六十餘里耳則是甸服之地自跨冀豫冀山而豫平緬想當時甸服之地當亦如周室王畿之制蓋成周之制雖云規方千里以為王畿然西自邠岐豐鎬為方八百里東則洛陽四達方六百里總為千里爾五服之制其間絕長補短計亦如此何則周都豐鎬西至犬戎約餘千里而犬戎之地自為荒服先王之制賓服者享荒服者王自穆王以犬戎地近責其從賓服之享自是荒服者不至則是五服之制計古亦有因地而為長短者蓋諸侯之分時以為朝貢之限制亦有在近而視速雖遠而視近者大率地有廣狹俗有夷夏未必四面

截然如此。正。方。聖。人。立。為。限。制。之。經。於。中。固。必。有。通。變。之。義。讀。書。者。不。可。拘。於。一。說。而。不。知。聖。人。體。用。之。大。也。

甲子八十有一載肇十有二州

以時考之并用大紀甲子紀例

肇十有二州封十有二山濬川

禹貢九州莫高山大川此分為十二州故又分

表其山及通朝貢水道吳氏曰此節在禹治水之後其次叙不當在四罪之前蓋史官泛記舜所行之大事初不計前後之序是也九州之來舊矣而冀為其北自陶唐都冀其聲名文教自冀四達冀之北土所及固廣矣及水王既平人民加聚於是分冀州自衛水以北為并州營無間之地為幽州碣石以東接青州之北為營州是為十有二州焉考詩書傳記所紀其後復為九州蓋九州為正而幽并營不過分統青冀之故地是以殷之

制合并為幽，合青為營，分梁以入于雍。刊州之制，合梁為雍，合徐為青，而并與幽。冀復三焉，畧見爾雅。詳見職方氏所記。職方幽州，其山鎮曰醫，無閭。其川河泝并州。其山鎮曰恒山，其川滹沱。嘔夷然則營州，其山碣石。其川潦水與。吳氏春秋曰：堯號禹曰伯禹，蓋封之為侯伯也。官曰司空，總掌天下水土，賜姓姒氏，領統州伯。以巡十二部，則分十二州。在此時可知矣。

封伯禹於有

夏封四岳於有呂

國語太子晉曰：伯禹念前之非，度釐改制，量象物天地比類百則儀之于

民而度之于羣生，共之從孫。四岳佐之，高高下下，疏川道滯，鍾水豐物，封崇九山，決汨九川，陂障九澤，豐殖九藪。汨越九原，宅居九隩，合通四海，莫非嘉績。克厭帝心，賜姓曰姒氏，曰有夏，謂其能以嘉祉殷富生物也。胙四岳國命為侯，伯賜姓曰姜氏，曰有呂，謂其能為禹股肱心膂，以養物豐民人也。加賜伯益，史記秦紀

曰帝顓頊之苗裔孫曰女修生子大業大業取少典之
子曰文華生大費與禹平水土已成禹曰非子能成亦
大費為輔帝曰咨爾費贊禹功其賜爾阜游爾後嗣將
大出乃妻之姚姓之玉女佐舜調馴鳥獸鳥獸多馴服
是為柏翳即伯益也柏亦作伯舜賜姓嬴氏不言封國
舊必已有封國也命為侯伯賜姓以榮之耳索隱曰此
秦趙之祖一名伯翳尚書謂之益世本漢書謂之伯益
是也尋檢史記上下諸文柏翳與伯益是一人不疑而
陳杞世家即叙柏翳與伯益為二未
知太史公疑而未決耶而亦謬誤也

履祥按伯益即柏翳也秦聲以入為去故謂益為翳
也字有四聲古多轉用如益之為翳契去聲之為禹
入聲臯之為咎音高君牙之為君雅是也此古聲之
通用也有同音而異文者如陶之為繇垂之為倭繇
之為鮐虺之為徧紂之為受罔之為羿是也此古字
之通用也太史公見書孟子之言益也則五帝本紀

言益見秦紀之為翳也則秦本記從翳蓋疑而未決也疑而未決故於陳祀世家之本又言垂益夔龍不知所封則遂謬矣胡不合二書而思之乎夫秦記不燒太史所據以紀秦者也秦紀所謂佐禹治水豈非書所謂隨山刊木暨益奏庶鮮食者乎所謂馴服鳥獸豈非書所謂益作朕虞若予上下鳥獸者乎其事同其聲同而獨以二書字異乃析一人而二之可謂誤矣唐虞功臣獨四岳不名耳而姜姓則見於書傳甚明也其餘未有無名者夫豈別有柏翳其功如此而反不見於書又豈有馴服鳥獸者孰加於伯益雖未虎熊羆亦以類見果又柏翳才績如此而書反不及乎夫以柏翳不得為伯益則禹不得為契臯繇不得為臯陶倕不得為垂鯀不得為鯀也如仲偃不得為仲虺紂不得為受羿不得為罔君雅不得為君牙乎史記本紀世家及總叙之謬如此者多不惟叙益為然也重黎二人而合為一則楚有二祖也四岳為

齊世家之祖而總叙齊人伯夷之後則齊又二祖也此其前後必出於談遷二手矣故其乖刺如此而羅氏路史因之真以益翳為二人又以柏翳為皋陶之子則羸郟李三姓無辨矣且楚人滅六之時秦方盛於西徐延於東趙基於晉使柏翳果皋陶之子臧文仲安得云皋陶不祀乎又以益為高陽氏之才子臧文默至夏啟時則二百有餘歲矣夫堯老而舜攝舜堯期而薦禹豈有禹且老而薦二百歲之益以為身後之計乎其非事實不可以不辨

封契於商

商頌長發之詩曰澹哲維商長發其祥洪水茫茫禹敷下土方集傳曰絕句楚辭天問禹降省下土蓋用此語外大國是疆幅愼既長有城方將帝立子生商集傳曰方四方也外大國遠諸侯也有城契之母家也將大也言商世世有澹哲之君其受命之祥發見也久矣方禹治水以外大國為中國之境幅員

廣大之時有娥氏始天故帝立其女之子而造商室也
蓋契於時始為舜司徒掌布五教于四方而商之受命
實基於此履祥謂帝立子生商子女也生猶甥也謂
帝立有娥氏女所生者為商蓋其時帝舜封契于商也
史記本紀曰簡狄有娥氏女為帝嚳次妃三人行浴見
玄鳥墮其卵簡狄吞之因孕生契契長而佐禹治水有
功帝舜乃命契為司徒封於商賜姓子氏素隱曰契
生堯代舜始舉之必非讐子以其父微故不著名其母
有娥氏女與宗婦三人浴于川則非帝嚳次妃明矣
老泉蘇氏曰史記載簡狄行浴見燕墮卵取而吞之因
生契為商始祖神奇妖濫不亦甚乎使聖人而有異于
衆庶也天地必將儲陰陽之和積元氣之英以生又焉
用此微禽之卵哉無墮卵於前取而吞之簡狄其傷心
乎史遭之意必以詩有天命鳥降而生商而言之此
遷求詩之過也毛公之傳詩也以鳥降為祀郊禘之侯
及鄭之箋而後有吞踐之事遷之說求於疑詩而鄭之

說又出於從遷矣甚矣
遷之以不祥誣聖人也

履祥按史記自謂以頌次契之事然不得頌之意玄
鳥之頌曰天命玄鳥降而生商蓋古人以玄鳥至之
日祠于高禩以祈子也簡狄以是日祈焉而孕故詩
述其威生之祥史以行浴陸卵之事附之幾於罔矣
長發之頌禘祫之詩也推其祖之所自出者不過以
禹敷土之時有娥外氏之盛而契始受封有國是開
有商一代之基亦未見其為嚳子也豈以太史克有
高辛氏才子之言傳者有殷人禘嚳之說遂繫之嚳
與然以頌次之則史傳之言為不可信矣其後十
四世而湯有天下祖契始封之君追王玄王云

封棄於邠

稷之受封詩書不載所始但禹之治
水暨益暨稷而後賢每以禹稷並稱

當是之時禹以成功受封契亦以禹功之成始
封益又以佐禹之功加命則稷之封在此時無

疑也今附于禹功
之後甲子之紀焉

生民之詩曰厥初生民時維姜嫄生民如何克禋克祀

以弗無子履帝武敏歆攸介攸止載震載夙載生載育

時維后稷

姜嫄炎帝後有邰氏女姜姓名名禋祀者高禘之祭也禘即先媒蓋上古始為婚姻者後

世祀之未嫁者祈婚未育者祈子帝武巨人跡也姜嫄見地有巨人之跡履之而敏然歆歆若人道之感焉於是即其攸介攸止之處而震動夙肅震書作娠震肅即孕也由是有娠而生后稷也魯頌亦云上帝是依謂天之神馮依姜嫄之身

彌月而生后稷也

誕彌厥月先生如達不圻不副無

苗無害以赫厥靈上帝不寧不康禋祀居然生子

彌月滿十

月也達詩傳也未反小羊也羊子易生愚謂達如字亦
通先生如達不圻不副無留無害以赫厥靈詩人異之
也異之者神之也上帝不寧不康禋祀居然生
子姜嫄疑之也疑之者恥之也恥之故棄之
誕置之

隘巷牛羊腓字之誕置之平林會伐平林誕置之寒冰

鳥覆翼之鳥乃去矣后稷呱矣實覃實訏厥聲載路夫不

而育疑而棄之其誕實匍匐克岐克嶷以就口實甄之

荏菽荏菽旆旆禾役穰穰麻麥幪幪瓜瓞嗶嗶甄種也

豆也役列也麻子可食皮可績為衣麥麥年也瓜瓞誕
以為茹也稷自幼已能辨物惟知種植其天性然也

后稷之穡有相之道第厥豐草種之黃茂實方實苞實

種實發實秀實堅實好實穎實粟即有邵家室

稷_后

之穡凡上章崔蒧禾麥瓜瓠之類但后稷所種歛則各
有助其成實之道蓋知其性及其漬種之法與地之宜
天之時故實有以方苞種稷發秀堅好穎粟之也至下
章拒秬麩邕則又自后稷而始知種之爾堯以棄教民
稼穡有功生人故封之又以其母感化而育不由有父
故使其繼母氏之國胙之土而命之氏也邵又作簾在
京兆武功縣元和志曰邵在渭水之南漢渭縣是也縣
西二十里有簾城有后稷祠姜嫄祠史記取詩紀稷而
不實今止取詩為證不及下文史記曰初欲棄之因
名曰棄之為成人遂好耕農相地之宜宜穀者稼穡為
民皆法則之帝堯聞之舉棄為農師天下得其利有功
封棄於邵號曰后稷別姓姬氏路史曰稷字度辰
鄭石葵曰姑吉人
也后稷之元妃也

履祥按史記姜嫄帝嚳元妃蘇氏古史因之遂以后
稷為帝嚳之子嫄果元妃何嫌于不夫而棄其子稷
果嚳元妃之子何為舍嫡不立而別立堯周郊太祖
何為祖稷而不祖嚳周祀姜嫄何為舍祖而獨祀妣
命禹治水之時堯之年已七十有餘矣而禹猶暨稷
嚳之遺嫡何其少堯之嫡兄弟何其餘勞也堯有嫡
兄弟不能立又不能舉待舜而後舉之則堯何足以
為堯乎鄭康成知史記之說為不通則謂姜嫄嘗堯
之時為高辛氏世妃蓋其世胄之妃也二王之後得
用天子之禮故有郊禘弓禘之禮焉其說固足以濟
史記之說通矣抑以世胄之妃生子又何嫌疑而棄
之哉然則嫄稷母子果何若人耶曰證諸詩而已矣
生民之詩謂姜嫄履帝武而敏歆閔宮之詩謂上帝
依姜嫄而生稷則固不必舍二詩而他考也朱子曰
巨跡之說先儒或頗疑之而張子曰天地之始固未
嘗先有人也則人固有化而生者矣蓋天地之氣生

之也而蘇氏亦曰凡物之異於常物者其取天地之氣常多故其生也特異物固有然者矣神人之生而有以異於人何足怪哉故今以詩為斷不復上附於譽焉又按易大傳曰神農氏作斲木為耜揉木為耒以教天下則耕稼之利其來久矣書曰播時百穀詩稱誕降嘉種貽我來牟則百穀之備自稷始也趙過曰后稷始畎田則畎壟之法自稷始也晉董史曰辰以成善后稷是相則農時之節自后稷始也大哉后稷之為天下烈矣其慶流子孫光有天下宜哉

九十載

孔子曰舜其至孝矣五十而慕子曰五十而慕者予於大舜見之矣

癸未一百載帝乃殂落

書曰二十有八載

舜攝二十
八載也

帝乃殂落百姓如喪考妣

三載四海遺密八音

鬼神之義盡矣聖人在上又鬼神之神

盛故言其崩曰殂落百姓者畿內之民四海則凡天下之民也孔子曰大哉堯之為君也惟天為大惟堯則

之蕩蕩乎民無能名焉堯堯乎其有成功也煥乎其有文章文章謂其禮樂制度所以經緯乎天下者也

史曰帝堯之子十其長號監明先死監明之子式封于劉其後有劉累事存漢紀生有文在手曰劉錙留同富

宜氏史漢作散宜氏生未驚恨媚克兄弟為閭囂訟媿淫帝悲之制奕以閑其情使出就丹虞氏國之房夏后

封之唐庶子九其後傳鑄冀卯襍函高唐上唐唐杜皆其後御龍豕韋魯今在汝范隨士劉見左氏鄭康成

曰堯遊城陽而死葬焉外紀曰葬穀林古史曰堯後有劉累者學擾龍於豢龍氏事夏孔甲賜氏曰御龍

以更豕韋之後為豕韋氏商之衰徙居於唐周以唐封叔虞後自唐徙杜為唐杜氏宣王誅杜伯其子隰叔適

晉為范氏范武子奔秦自秦復歸于晉其處者為劉氏

履祥按堯老而舜攝二十有八年堯與天下相志久矣一朝殂落而百姓如考妣之喪孟子曰堯之所以

治民舜之所以事君于此亦可見矣

甲申百有一載

乙酉百有二載舜避于南河之南

孟子曰舜相堯二十有八載非人之所能

為也天也堯崩三年之喪畢舜避堯之子于南河之南天下諸侯朝覲者不之堯之子而之舜訟獄者不之堯之子而之舜謳歌者不謳歌堯之子而謳歌舜故曰天也夫然後之中國踐天子位焉而居堯之宮逼堯之子是篡也非天與也古史論曰舜禹之攝格于祖考郊祀天地朝見諸侯巡狩方嶽行天子之事矣及其終而

避之何哉使舜禹避之天下歸之而其子不順將從天下而廢其子歟將奉其子而違天下歟此事之至逆由避致之也至蓋不度天命而受位於禹避之而天下不從然後不敢為匹夫猶且恥之而謂益為之哉 大紀曰既除喪舜委政於皋陶退避於南河之南論曰堯命舜舜命禹行天下之事舜禹亦既受命行天下之事矣及堯舜既終又避其子何哉人臣至于代天子行天下之政已亢矣况又將去人臣以為天子乎堯舜之喪甫除舜禹政自己出使丹朱商均去其宮室可則可矣是用九為首非所以明微也故舜禹避之以展天下之情或揖讓之禮其心與計利害者遠乎如天地之不相及也使舜禹而有計利害之心則是以爭奪行尚何授受之有若夫益則又異于舜禹矣啟賢能敬承繼之道益歷事三代年亦老矣奉身而退順天道也讀書者能無以文害辭無以辭害意則孟軻氏之言槩然明白無可疑者 張氏紀年叙曰孟子謂堯舜三年之喪畢舜

禹避堯舜之子而天下歸之然後踐天子位此乃見帝王奉天命之大旨其可闡而弗章故以甲申書服堯之喪乙酉書踐位之實丙戌書元載格于文祖自乙酉至丁己是踐位三十有二載也則書薦禹于天與尚書命禹之辭合自丁己至癸酉是薦禹十有七年也與孟子之說合於禹受命之際書法亦然然而書稱舜在位五十載則是史官自堯崩之明年通數之爾朱子曰舜禹避朱均而天下歸之蘇子慮其避之足以致天下之逆至益避啟而天下歸啟蘇子又譏其避之為不度而無恥於是凡孟子史遷之所傳者皆以為誕妄而不之信今固未暇質其有無然蘇子之所以為說者類皆以世俗不誠之心度聖賢則不可以不之辨也聖賢之心淡然而無欲豈有取天下之意哉顧辭讓之發則有根於所性而不能己者苟非所據則雖卮酒豆肉猶知避之况乎秉權據重而天下有歸己之勢則亦安能無所惕然于中而不遠引以避之哉避之而彼不吾釋則不獲

已而受之何病於逆避之而幸其舍則固得吾本心之
所欲而又何恥焉唯不避而強取之乃為逆偃然當之
而彼不吾歸乃可恥耳如蘇子之言則是凡世之為辭
讓者皆陰欲取之而陽為避避是以其言反於事實至
於如此而不自知其非也舜禹之事世固不以為疑今
不復論至益之事則亦有不能無感于其說者殊不知
若太甲賢而伊尹告歸成王冠而周公還政宣王有志
而共和罷此類多矣當行而行當止而止而又何恥焉
蘇子蓋賢共伯而尚何疑於益哉若曰受人之寄則當
遂有之而不可歸歸之則為不度而無恥則是王莽司
操司馬懿父子之心而楊堅夫婦所謂騎虎
之勢也乃欲以是而言聖賢之事其誤甚矣

履祥按春秋以上君薨嗣君踰年即位于廟夫即位
必踰年者當喪未君也而年而即位者不可曠年無
君也獨唐虞之際三年之喪畢而始即位何以知其
然書稱帝乃殂落三載四海遇密八音矣而後書月

正元日舜格于文祖則是舜之即位在三載之後也
書註舜服堯喪三年畢將即位故復至文祖廟司馬
稽古錄亦云然即位於三載之後則聖人之心可見
矣南河之避何足疑乎且謂避之非者以勢言也聖
人有天下而不與固不以勢之利害入其心者而况
五帝之世世質民淳帝堯陶天下於禮遜雍睦之中
百有餘載禹岳諸聖咸萃朝廷當是時也帝舜從
容其間勢亦無不可者夫聖經者事之衷也聖心者
經之主也論事而折衷於聖經
以求聖人之心焉是為得之矣

資治通鑑前編卷一